

Siunnersuummut oqaaseqaatit

Nassuiaatit nalinginnaasut

1. AALLAQQAASIUT

1.1 Siunnersuutip tunuliaqutaa

Kommunit aqunneqarnerat pillugu Inatsisartut inatsisaat maannakkut atuuttoq 2010-mi akuersisutigineqarpoq 2013-imilu allangortinneqarluni. Inatsisikkut siusinnerusukku Inatsisartut inatsisaat 2008-meersoq taarserneqarpoq.

Siunnersuut manna Siumup, Inuit Ataqatigiit aamma Partii Naleqqap 2016 - 2018-imut Naalakkersuisooqatigiinnissamik isumaqatigiissutaannik - Naligiinneq, Toqqissisimaneq Ineriartorneq - piviusunngortitsineruvoq. Taamaaliormermikkut Naalakkersuisut kissaatigaat nunaqarfanni aqutsisut piviusunik aalajangiisarnissamut oqartussaaffeqalermikkut aningaasaqarnermullu tunngatillugu aalajangiisinnaassuseqalermikkut nukittorsarneqassasut soorluttaaq nuna tamakkerlugu najukkanni ataatsimiititaliaqalernissaa anguniagaasoq.

2018-imi kommunit agguarsimaleriarpata kommunini aqqissuussaanerit annertuumik allanngoqqissapput. Taamatuttaaq KANUKOKA-mut inassisimanagerup allangorsimanagerata nassatarisimavaa aalajangersakkanik iluarsaassinissamut pisariaqartitsineq, tassani KANUKOKA toqqaasinnaanermut isumaqatiginninniarsinnaanermullu piginnaatitaaffeqarsimasoq kommunit KANUKOKA-mut ilaasortaasut sinnerlugit. Taamatuttaaq Naalakkersuisut kissaatigaat inatsisit allannguutaat ataatsimoortillugit inatsimmut suliarineqassasut kommunit allallu sapinngisamik pitsaanerpaanik sulinerminnut atortussaarsinnaaqqullugit. Kiisalu missingersuusiortarnermut inatsisip nutaap akuersisutigineqarnerata malitsigisaanik iluarsisuteqartoqartarsimavoq.

Naalakkersuisut nalilerpaat allannguutaasut tunngavigalugit kommunit aqunneqarneranni malittarisassat pissutsinut ullumikkut atugaasunut naleqquttuusut kommunillu aqunneqarnerannut pisariaqartinneqartunut naleqqullutik.

2. Siunnersuummi immikkoortut pingaarnerit

2.1 Aalajangersakkat nalinginnaasut

Kommunit aqunneqarnerat pillugu aalajangersakkat nalinginnaasut kapitali 1-imi malittarisassaqtitaapput. Aalajangersakkat aalajangersakkat maannakkut atuuttut assigaat.

2.2 Kommunalbestyrelse

Kommunalbestyrelsip il.il. katitigaanera, borgmesterimik borgmesterillu tullersortaanik qinersineq kiisalu kommunalbestyrelsip ataatsimiittarneri, suliamut akuliuteqqusaannginneq peqataanngitsoortarnerlu kapitali 2-mi malittarisassaqaartitaapput.

Naalakkersuisut siunnersuutigaat Avannaata Kommuniani kommunalbestyrelse 17-inik aamma Kommune Qeqertalimmi kommunalbestyrelse 15-inik ilaasortaqaassasut. Kommunalbestyrelsit ilaasortaqqortussusii kommunit inuttussusii tunngavigalugit aalajangersarneqarput. Siunnersuutigineqarportaaq Kommuneqarfik Sermersuumi kommunalbestyrelsi 19-inik ilaasortaqaassasoq.

Kommunalbestyrelsit nammineerlutik aalajangersinnaavaat ilaasortat ikinnerussanersut kisiannili amerlanerunatik.

Kommunalbestyrelsinut ilaasortat amerlassusii kommunioreersunut tunngatillugu maannakkut ilaasortat amerlassusii aallaavigalugit ingerlaqqiinnassasut siunnersuutigineqarpoq.

2.3 Borgmesterip aamma borgmesterip tulliata atuunnerat

Borgmesterip aamma borgmesterip tulliata atuunnerat kapitali 3-mi malittarisassaqaartitaapput. Aalajangersakkat aalajangersakkat maannakkut atuuttut assigaat.

2.4 Ataatsimiititaliat ilaalu ilanngullugit

Aningaasaqarnermut ataatsimiititaliaq, ataatsimiititaliat ataavartut, ataatsimiititaliat, isumalioqatigiissitat il.il. kapitali 4-mi malittarisassaqaartitaapput.

Naalakkersuisut siunnersuutigaat illoqarfinni kommunip ingerlatsiviata qullersaqarfiginngisaani najukkani ataatsimiititalianik pilersitsisoqassasoq. Taamaalillutik najukkani ataatsimiititaliat Kommunilbestyrelsimi sumiiffiup sinniisussaannik qinersinermut aqqissuussaq atuutereersumut ilu-aqutaassapput.

Kommunalbestyrelse aningaasanik atugassanngortitsissaaq najukkani ataatsimiititaliat nammineerlutik atorsinnaasaannik. Aningaasat tamanik tusarniaanernut, kultureqarnermut, timersornermut inuiaqatigiinnilu sulissutigineqartunut atorneqartassapput.

Taamatuttaaq najukkani ataatsimiititaliat kommunalbestyrelsimut, aningaasaqarnermut ataatsimiititaliamut aamma ataatsimiititalianut ataavartunut siunnersuinernik suliaqartassapput kommunalbestyrelsillu suliakkiineratigut aalajangersimasunik suliaqartarsinnaallutik.

Kommunalbestyrelse najukkani ataatsimiititaliat ilaasortaannut aalajangersimasunik aningaasarsiaqartitsisinnaavoq.

Najukkami ataatsimiititaliamut aalajangersakkat eqqaassanngikkaanni, inatsisissatut siunnersuummi, kapitali 4-mi, ataatsimiititalianut il.il. tunngasumi aalajangersakkat maannakkut atuuttut assigaat.

2.5 Nunaqarfinni aqutsisut

Nunaqarfinni aqutsisut kapitali 5-imi malittarisassaqaartitaapput.

Naalackersuisut siunnersuutigaat kommunalbestyrelsip pisussaaffigissagaa nunaqarfinni aqutsisunut aningaasanik atugassanngortitsisoqartarnissaa, taakku suliaassaqaarfinni ukunani ataatsimi arlalinniluunniit aalajangiisoqarneratigut atortarsinnaasaannik:

- 1) Kulturimut innuttaasunillu qaammarsaanermut.
- 2) Timersornermut.
- 3) Teknikkikkut sulianut aamma pilersuinermit.
- 4) Nunaqarfimmi najugallit inuussutissarsiutinik suliniutigisaannut.
- 5) Inuit akornanni sammisaqaartitsinermit.

Tamakku saniatigut kingunerisaasunik iluarsisuteqartoqarpoq. Allanik allanngortitsisoqarnissaa eqqarsaatigineqanngilaq.

2.6 Nakkutilliineq

Kommunik nakkutilliineq kapitali 6-imi malittarisassaqaartitaavoq.

Naalackersuisut siunnersuutigaat Nakkutilliisoqarfimmut ilaasortaasut marluk, aalajangersakkat maannakkut atuuttut malillugit KANUKOKA-mit toqarneqartartut, matuma kingornatigut kommunit ataatsimoorlutik toqqartalissagaat. Siunnersuut Kommuneqarfik Sermersuup ilaasortaajunnaarneratigut KANUKOKA-p allatut inissisimalernerata kinguneraa.

Tamakku saniatigut kingunerisaasunik iluarsisuteqartoqarpoq. Allanik allanngortitsisoqarnissaa eqqarsaatigineqanngilaq.

2.7 Aningaasarsiat

Borgmesterinut, kommunalbestyrelsimi ilaasortanut, aamma kommunit sulisuinut aningaasarsiat kapitali 7-imi malittarisassaqaartitaapput.

Naalackersuisut siunnersuutigaat kommunit sulisuinut nalinginnaasumik aningaasarsiatigut, atorfeqarfittaanikkut soraarnerussutisiassaqaartitaanikkullu atugassarititaasut pillugit aalajangersakkat Naalackersuisut kommunillu akornanni isumaqatigiissuteqartoqarneratigut aalajangersarneqartalisasut; tassa Naalackersuisut KANUKOKA-llu akornanni aalajangersakkat maannakkut atuuttut malikkunnaarlugit. Siunnersuut Kommuneqarfik Sermersooq ilaasortaajunnaarnerata kinguneranik KANUKOKA-p allanngornerata kinguneraa.

Tamakku saniatigut kingunerisaasunik iluarsissuteqartoqarpoq. Allannik allannortitsisoqarnissaa eqqarsaatigineqanngilaq.

2.8 Pineqaatissiisarneq aamma taarsiissuteqartitsisarneq

Kommunalbestyrelsimut ilaasortanik pineqaatissiisarneq aamma taarsiissuteqartitsisarneq kapitali 8-mi malittarisassaqtitaapput.

Tamakku saniatigut kingunerisaasunik iluarsissuteqartoqarpoq. Allannik allannortitsisoqarnissaa eqqarsaatigineqanngilaq.

2.9 Atortuulersitsineq

Siunnersuut 1. januar 2018-imi atuutilissasoq siunnersuutigineqarpoq.

3. Pisortanut aningaasaqarnikkut allaffissornikkullu sunniutissat

Siunnersuut manna kommuninut aningaasaqarnermut tunngatillugu kinguneqassanngitsoq naatsorsuutigineqarpoq. Taamaalilluni najukkani ataatsimiititalianut aningaasarsiarititassaajumaartut kiisalu najukkani ataatsimiititaliat nunaqarfinnilu aqutsisut aningaasat atorsinnaasaat missingersuutitigut killiliussaareersut iluanni nassaarineqarsinnaasarnissaat naatsorsuutigineqarpoq. Taamaammat naatsorsuutigineqarpoq nunaqarfinni aqutsisut sulinerannut aamma najukkani ataatsimiititalianik pilersitsinernut aningaasartuutit kommuninut aningaasartuutaassanngitsut.

4. Inuussutissarsiornermut aningaasaqarnikkut allaffissornikkullu sunniutissat

Siunnersuut aningaasaqarnikkut allaffissornikkullu inuussutissarsiortunut allanullu kinguneqartitsissanngilaq.

5. Avatangiisinut, pinngortitamut inuillu peqqinnissaannut sunniutissat

Siunnersuut pinngortitamut, avatangiisinut aamma inuiaat peqqissusaanut kinguneqassanngilaq.

6. Innuttaasunut aningaasaqarnikkut sunniutissat

Siunnersuut aaqqissuusseqqinnermik nangitsineruvoq aammalu kommunit oqartussaaffiiniq siamaanikkut malunniuteqassalluni.

Taamatuttaaq najukkani kikkulluunniit oqartussaaqataaernerat nunaqarfinni aqutsisut piginnaatitaaffiisa nukittorsarneqarnerisigut taamatullu najukkani ataatsimiititalianik pilersitsisussaataalersitsinikkut nukittorsarneqassasoq naatsorsuutigineqarpoq.

Tamanna innuttaasunut ataasiakkaanut oqartussaasunut pisariaqartinneqartunut ornigussinnaanerannik taamaalillunilu inatsisitigut isumannaannerulernissamik kinguneqassaaq.

7. Kingunissat allat annertuut

Siunnersuut pingaarutilinnut allanut kinguneqartitsissanngilaq.

8. Oqartussanik kattuffinnik il.il. tusarniaaneq

Naalakkersuisut siunnersuut 2017-imi maajip ulluisa 11-anniit juunip ulluisa 25-annut tusarniaasutigaat.

Inatsisartut inatsisissaattut siunnersuut ukununnga tusarniaassutigineqarpoq:

Qaasuitsup Kommunia, Qeqqata Kommunia, Kommuneqarfik Sermersooq, Kommune Kujalleq, KANUKOKA, KANUNUPE, Kommunernes revision (BDO), Deloitte, AK, SIK, IMAK, GA, PIP, ASG, Sundhedskartellet aamma Naalakkersuisut Siulittaasuata Naalakkersuisoqarfia, Pinngortitamut Avatagiisinullu Naalakkersuisoqarfik, Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfik, Inuussutissarsionermut, Suliffeqarnermut Niuernermut Nukissiuuteqarnermullu Naalakkersuisoqarfik, Aalisarnermut Piniarnermullu Naalakkersuisoqarfik, Aningaasaqarnermut Akileraartarnermullu Naalakkersuisoqarfik, Ilinniartitaanermut, Kultureqarnermut, Iisimatusernermut Ilageeqarnermullu Naalakkersuisoqarfik, Peqqissutsimut Naalakkersuisoqarfik, Namminiilivinnermut, Nunanut Allanut Nunalerinnermullu Naalakkersuisoqarfik kiisalu Aatsitassanut Ikummatissanullu Naalakkersuisoqarfik.

18-inik tusarniaanermut akissuteqartoqarpoq:

Naalakkersuisut Siulittaasuata Naalakkersuisoqarfia, Ilinniartitaanermut, Kultureqarnermut Iisimatusernermut Ilageeqarnermullu Naalakkersuisoqarfik, Aningaasaqarnermut Akileraartarnermullu Naalakkersuisoqarfik, Aningaasaqarnermut Sulisoqarnermullu Aqutsisoqarfik, Akileraartarnermut Aqutsisoqarfik, Peqqissutsimut Naalakkersuisoqarfik, Peqqissutsimut Pitsaaliuinnermullu Aqutsisoqarfik, Isumaginninnermut, Ilaqutariinnermut, Naligiissitaanermut Inatsisinillu atuutsitsinnermut Naalakkersuisoqarfik, Aatsitassanut Naalakkersuisoqarfik, Aalisarnermut Piniarnermullu Naalakkersuisoqarfik, KANUKOKA, Qeqqata Kommunia, Kommune Kujalleq, Kommuneqarfik Sermersooq, IMAK, AK, SIK aamma GE.

Tusarniaanermut allakkiaq tusarniaanermut akissutit pillugit paasissutissartalik aamma Kommunit, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisoqarfiup manna pillugu oqaaseqaataanik imalik ilanngunneqarpoq.

Aalajangersakkanut ataasiakkaanut nassuiaatit

§ 1-imut

Aalajangersagaq kommunit aqunneqarnerat pillugu Inatsisartut inatsisaanni atuuttumi § 1-imik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq kommunimi suliassat aqunneqarnerat pillugu kommunalbestyrelsi akisussaasuusoq.

Imm. 2-mut

Aalajangersakkap kommunalbestyrelsi aqutsinnermut ileqqoreqqusamik akuersisinnaatippaa, tassanilu kommunip aqunneqarnera borgmesterillu suliassai aalajangersarneqarput. Tassa kommunip qanoq aqunneqarnissaa pineqarpoq. Aqutsinnermut ileqqoreqqusaq manna pillugu tunngaviusumik maleruagqusanik taamaallaat imaqassaaq.

Imm. 3-mut

Kommunalbestyrelsip anguniassavaa, suliassat ingerlanneqartarnerannut pissutsit tamarmik kommunalbestyrelsip suleriaasissatut maleruagassiaani katersorneqassasut, tamakkulu aalajangersakkat aqutsinnermut ileqqoreqqusamiissanngitsut.

Imm. 4-mut

Suleriaasissamut aammalu aqutsinnermut ileqqoreqqusat nassiunneqarnissaanut piunasaqaat tunulequtaqarpoq Naalakkersuisut kommunalbestyrelsip sulianik ingerlatseriaasiat pillugu aalajangersakkanik aamma inatsisit atuutsinneqarnerannik nakkutilliinermik ingerlataqarmata. Kommunalbestyrelsip suleriaatsimut malittarisassaq aamma aqutsinnermut ileqqoreqqusaq Naalakkersuisunut nassiutinngippagit suleriaasissamut nalinginnaasumik malittarisassaq imaluunniit aqutsinnermut nalinginnaasumik ileqqoreqqusaq kommunalbestyrelsip sulinerani paatsuungasoqartillugu atorneqassapput.

Imm. 5-mut

Aalajangersakkakut qulakkeerniarneqarpoq kommunalbestyrelsimi aqutsinnermut ileqqoreqqusamik aamma suleriaatsimut malittarisassanik peqartuaannarnissaa. Aalajangersagarli kommunalbestyrelsip kommunimi namminerisamik aqutsinnermut ileqqoreqqusamik suleriaasissamullu malittarisassaqarnissaanut pisussaaffeqarneranik atorunnaarsitsinngilaq.

Kiisalu suleriaatsimut malittarisassaq aamma aqutsinnermut ileqqoreqqusaq nalinginnaasut maleruagassat qanoq paasineqarnissaannik nalornisoornermi isummertarnermut atorneqartussaapput.

§ 2-imut

Aalajangersagaq § 2-mik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Kommunip ilisarnaataa kommunimi pineqartumi oqartussaasut kisimik atugassaraat. Taamaattoq ilisarnaatip atorpeqarnissaanut qinnuteqartoqartillugu pinerit tamaasa allat ilisarnaammik atuisinnaanerannut kommunalbestyrelsi akuersisinnaavoq. Ilisarnaatip aningaasarsiutitut atorpeqarnissaanut akuersineq sullissinnermut akitsuutitut akiliuteqarnissaq piumasqaatinngortinneqarsinnaavoq.

Kommunalbestyrelsip akitsuummik akiliutissamik ataasiartamik aalajangersaasinnaavoq imaluunniit piffissamut aalajangersimasumut akilertagassatut, kommunip ilisarnaataata qanoq atorpeqarnissanut akuersissuteqarneq qanoq ittuunersoq naapertorlugu.

Assersuutigalugu naqitiganngorlugu ilisarititsiniutitut imaluunniit takoqqusaarutitut kommunip ilisarnaataata atorpeqarnissaa akuersissutigineqarpat tamanna ataasiartuuppat, ataasiartumik akilerneqarnissaa aalajangerneqarsinnaavoq, piffissamili sivisuumi, soorlu puussiani ataasiarlugu atorpeqartartuni ilisarnaatitut atorpeqarpat piffissami aalajangersimasumi akilertagassatut aalajangerneqarsinnaalluni.

Kommunalbestyrelsip kommunip ilisarnaataata atorpeqarnissaanut qinnuteqaatip suliarineqarneranut atatillugu aningaasartuutaasut qaangerlugit akiliutissamik annertussusiliisinnaanngilaq.

Akiliut kommunip isertittagaatut allatulli missingersuusiorneqassaaq, missingersuusiallu akuersissutigineqareersut avataatigut aalajangiivigineqassaguni ilassutitut akuersissutigineqartariaqarsinnaavoq.

Kommunip ilisarnaataanik atuinissamik akuersissummi ersarissumik takuneqarsinnaasariaqarpoq piumasqaataasut suut malillugit ilisarnaammik atuinermut akiliut aalajangersarneqarsimanersoq, taamaasillunilu misissorneqarsinnaalluni akuersissutit naligiissuseq tunngavigalugu tunniussisoqarsimasoq.

§ 3-imut

Aalajangersakkakut kommunini kommunalbestyrelsinut ilaasortat amerlanerpaaffissaat aalajangersarneqarput, peqatigitillugulu kommunalbestyrelsit ataasiakkaat kommunalbestyrelsimut ilaasortanik ikilisitsisinaanerat malittarisassiunneqarluni. Aalajangersagaq Avannaata Kommunia aamma Kommune Qeqertalik pilersinnerata kingunerisaanik allanngortinneqarsinnaanngilaq.

Taassuma saniatigut Kommuneqarfik Sermersuumi kommunalbestyrelsemi ilaasortat amerlanerpaaffissaat 21-init 19-inngortinneqarput.

Imm. 1-imut

Kommuni Qeqertalimmi, Qeqqata Kommuniani aamma Kommune Kujallermi kommunalbestyrelsimut ilaasortat 15-it qinerneqartassapput, Avannaata Kommuniani kommunalbestyrelsimut ilaasortat 17-it qinerneqartassapput Kommuneqarfik Sermersuumilu kommunalbestyrelsimut ilaasortat 19-it qinerneqartassallutik. Naalakkersuisut suli amerlanerpaaffiliinerup ingerlaannarnissaa pingaartippaat, kisiannili imm. 2 naapertorlugu kommuni kommunalbestyrelsimut ilaasortanik ikinnerusunik toqqaaniarluni aalajangerpat tamanna ajornartorsiutissartaqanngitsutut isumaqarfigalugu.

Imm. 2-mut

Kommunalbestyrelsi ukioq naatinnagu qinersinissaq sioqqullugu kommunalbestyrelsimi ilaasortannortussat imm. 1-imi aalajangersarneqartunit ikinnerunissaat aalajangersinnaavaat. Ilaasortat akunnattumik amerlassuseqassapput aqutsinermilu ileqqoreqqusami allassimassallutik.

§ 4-imut

Aalajangersagaq § 4-mik atuuttumik ingerlatitseqqinneruvoq allannortitsisoqarnissaanillu eqqarsaateqartoqanngilaq.

Imm. 1-imut

Kommunalbestyrelse qinigaarlaaq siusinnerpaamik maajip aallaqqaataani inissititerilluni ataatsimiissinnaasoq aalangersarneqarpoq, tassa imaappoq qinersinermik siulersuisut ilaasortat nutaat akuerereerpassuk kommunalbestyrelsiusimasoq tunuarpat, aalajangiussarlu ullut arfineq marluk qaangiutsinnagit Qinersinermut ataatsimiititaliamut naammagittaalliutigineqanngippat. Kommunalbestyrelsioreersoq ingerlaqqinnassaaq, misilinneqarnerup naammassineqarnissaata tungaanut. Kommunalbestyrelsimi ilaasortat qinigaasut, kommunalbestyrelsi atuuttusoq ingerlaannassaaq, qinigaasinnaassutsip misilinneqarnerisa naammassinissaata tungaanut.

Kommunalbestyrelsip inissititerluni ataatsimiinnissaanut qaaqqusissut allakkatigut pissaaq, tamatumani fax-i imaluunniit e-mail atorneqarsinnaavoq.

Imm. 2-mut

Ataatsimiinneq inummit ataatsimiigiaqqusisumit aqunneqassaaq. Aalajangersakkami inissitsiterluni ataatsimiinnermut ilaasortaq qaaqqusisoq peqataasinnaanngippat periusissaq sillimaffigineqarpoq. Aalajangersakkami isumaqatigiinniarnerni eqqartorneqartuni taamaallaat inissitsiterluni

ataatsimiinnermut tunngatillugu isumaqatigiinniarneq pineqarpoq, tassunga ilanngullugu borgmesterimik qinersineq.

§ 5-imut

Aalajangersagaq § 5-imik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Aalajangersagaq manna aamma § 19 peqatigalugu Inatsisartut inatsisaanni matumani aalajangersagatuaapput tassaasut aalajangiussisut kommunimi allaffissornikkut aqutsinermi pisortatut suliassat borgmesterip pisortaaffigigai.

Aalajangersakkap aalajangerpaa, allaffeqarfik aqutsinermik ingerlatsinermut ilaa soq kommunalbestyrelsi pingaanagerusutut aqutsisoralugu. Allamik immikkut inatsimmi aalajangersaasoqarsimatinnagu kommunalbestyrelsi ingerlatsivinnut suliassanut tunngatillugu akisussaaffinnik tunniussisarnissamik nammineeerluni aalajangersagaliorsinnaavoq.

Aalajangersakkami erseqqissarneqarpoq kommunalbestyrelsip aamma aningaasaqarnermut ataatsimiititaliap sulisunik atorfinitsitsisarnerni soraarsitsisarnernilu suliassaasa avissimanerat, taamaasillunilu kommunalbestyrelsip taamaallaat kommunaldirektøri atorfinitsittarlugulu soraarsissinnaagaa, aningaasaqarmermulli ataatsimiititaliap sulisoqarnermi pissutsit allat aqussallugit, tak. § 25, imm. 1, nr 2.

§ 6-imut

Aalajangersagaq § 6-imik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq inissitsiterluni ataatsimiinnermi borgmesterimik qinersineq siulliulluni oqaluuserisassaniissasoq.

Imm. 2-mut

Aalajangersakkami aalajangerneqarpoq naqissuserlugu, borgmesterimik qinersinermi amerlanerussuteqarnissaq piumasaqaataasoq. Qinigassanngortittut ilaannaalluunniit siullermeerluni taasinermi amerlanerussuteqartunit taaneqanngippat, taaseqqittoqassaaq. Taasinikkut tamatumuuna aamma qinigassanngortittoq ataaseq amerlanerussuteqavissumik taaneqanngippat taaseqqittoqassaaq qinigassanngortittut marluk amerlanerpaanik taaneqarsimasut akornanni. Taasinerlu taanna naligiiffiulluni inerneqarpat makitsisoqartassaaq.

Imm. 3-mut

Aalajangersakkami borgmesterip tullianik qinersineq maleruagassiorneqarpoq, borgmesterillu tullianik qinersineq borgmesterimik qinersinertut ingerlanneqassasoq aalajangersarneqarluni. Aammattaaq aalajangersakkami naqissuserneqarpoq borgmesterinngorlaap qinersineq aqussagaa. Borgmesteri peqanngippat borgmesterip tullianik qinersineq kommunalbestyrelsimi ilaasortap inissitsiternissamut qaaqquisuusup aqussavaa.

Imm. 4-mut

Aalajangersakkami maleruagassiorneqarpoq kommunalbestyrelsip aqutsinermut ileqqoreqqusami aalajangersagaqarnera naapertorlugu borgmesterip tullianik siullermik aamma borgmesterip tulliaa aappaanik qinersisoqassappat. Taamatut pisoqartillugu ilaasortat amerlassusaat naapertorlugit qinersisoqassaaq, § 36, imm. 4-mi nassuiarsimasoq naapertorlugu.

Imm. 5-mut

Aalajangersakkap erseqqissarpaa, borgmesterimik aamma borgmesterip tullianik qinersineq kommunalbestyrelsip qinigaaffianut tamarmiusumut atuuttusoq. Taamaattorli borgmesteri suliasaminik naammassinnikkumangippat, kommunalbestyrelsi § 23 naapertorlugu tunuarninnissaanut periarfissaqarpoq.

§ 7-imut

Aalajangersagaq oqaasertaasigut erseqqissarlugu § 7-imik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap naqissuserpaa, kommunalbestyrelsimut qinersinermi qinigaasunut borgmesteritut aamma borgmesterip tulliatut qinigaanermik akuersissuteqartussaaneq pisussaaffiusoq. Tamatumani pissusissamisoortutut isigineqarpoq kommunalbestyrelsimut ilaasortassatut qinigaasut kommunalbestyrelsimut qinigassanngortinnermikkut aamma borgmesteritut imaluunniit borgmesterip tulliatut qinerneqarsinnaaneq akuersissutigisimammassuk.

Imm. 2-mut

Aalajangersakkap kommunalbestyrelsi periarfissippaa borgmesteri imaluunniit borgmesterip tullia qinigaaffiup sinnerani atuuttussaajunnaartitsisinnaanermut, borgmesteri imaluunniit borgmesterip tullia atorfimmit tunuarniuteqassappat. Tunuarniuteqarnerup akuersissutigineqarneri suliani ataasiakkani nalilersuinikkut pisassaaq.

Imm. 3-mut

Aalajangersakkap naqissuserpaa, borgmesterimik imaluunniit borgmesterip tullianik nutaamik § 6 naapertorlugu qinersisoqassasoq, borgmesterip imaluunniit borgmesterip tulliaa atorfik qimappagu.

Aammattaaq erseqqissarneqarpoq, kommunini borgmesterip tulliinik marlunnik peqartuni borgmesterip tulliatut inuttaaruttoq ilaasortaataqartut qanoq amerlatigisunik ilaasortaqaassusiat naapertorlugu kisitsisit agguarnerat naapertorlugu naatsorsueriaaseq naapertorlugu eqimattat (suleqatigiit) borgmesterimut tulliusimasumik toqqaasimasut aamma nutaaq toqqaassagaat.

§ 8-mut

Aalajangersagaq § 8-imik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Imm. 1-imut

Ataatsimiittarnissamut pilersaarut saqqummiunneqassaaq kingusinnerpaamik ukiup naatsorsuiffiup aallartinnerani. Saqqummiussineq kommunip nittartagaani imaluunniit piffimmi aviisimi saqqummiuneqarsinnaavoq.

Aammattaaq ataatsimiinnissanut pilersaarut Naalakkersuisunut nassiunneqassaaq, kommunillu nakkutigineqarnerannut ilaatillugu Naalakkersuisut ilisimatinneqassapput kommunalbestyrelsip ataatsimiinnissai qanoq ilinerani ingerlanneqassanersut, tamatumani Naalakkersuisut ataatsimiinnernut peqataanissamik kissaateqassappata.

Imm. 2-mut

Aalajangersakkap qulakkeerpaa ataatsimiinnerit pilersaaruserinerinut atatillugu annerpaamik kommunalbestyrelsi nutaamik qinigaasup kiffaanngissuseqarnissaata qulakkeerneqarnissaa. Pissusissamisussanngilarmi kommunalbestyrelsi qinigaarlaaq kommunalbestyrelsip atorunnaartup ataatsimiinnissami pilersaarutaanik tunngaveqarluni ingerlatsissappat.

Imm. 3-mut

Kommunalbestyrelsip immikkut ittumik ataatsimiinnissaanut qaaqqusisinnaatitaaneq borgmesterimiippoq. Taamaattoq borgmesteri pisussaataavoq kommunalbestyrelsimi immikkut ataatsimiigiaqqusinissamut kommunalbestyrelsimi ilaasortat 1/3-iisa tamanna piumasaaqatigippassuk.

Immikkut ittumik ataatsimiinnissamik nalunaarut kommunip innuttaannut aamma Naalakkersuisunut ataatsimiinnissaq sioqqullugu periarfissaqarpat nalunaarutigineqassaaq. Avammut saqqummiussineq piffimmi aviisini ingerlanneqarpat saqqummiussinissamut piumasaaqatit eqqarsaatigalugit eqaannerusumik ingerlatsisoqassaaq.

Imm. 4-mut

Piffissaliineq aalajangerneqarluni ilanngunneqarpoq ataatsimiinnissaq sioqqullugu kommunalbestyrelsimut ilaasortat suliasamat pitsaasumik paasisaqarsimanissaat

qulakkeerniarlugu. Aalajangersagaq aammattaaq sunniuteqassaaq kommunalbestyrelsip ataatsimiittarneri pillugit ammanerusumik ingerlatsinissamut, soorunami nipangiussisussaataaneq tamatumani ilanngullugu eqqarsaatigineqassalluni.

Imm. 5-mut

Aalajangersagaq kommunalbestyrelsip sulinermini avammut ammasuunissaanut nukittorsaataassaaq.

Suliassat allattorsimaffiat saqqummiunneqartussaq ullormut oqaluuserisassanut missingersuut pinngitsoorani assigisariaqanngilaa. Imarisaanut allattorsimaffilli minnerpaamik suliassat sunik ima qarnerinik ima qassaaq. Allattorsimaffimmi suliassat ammasumik ataatsimiinnermi aamma matoqqasumik ataatsimiinnermi suliassatut aalajangersarneqarsimasut ilanngunneqassapput, soorunami nipangersimasussaataaneq eqqarsaatigereerlugu.

Ataatsimiinnermi aalajangersarneqartunut ima qarniliap saqqummiunneqarnerani nipangiussisimasussaataanermt inatsimmi pisussaataaffik kisimi killiliisuvoq.

Ataatsimiinnermi matoqqasumi aalajangiineq pippat, taanna nammineq kisimi pissutaatinneqarsinnaanngilaq aalajangiinerup ima qarniliamut avammut saqqummiunneqartumut ilanngunneqannginneranut.

Kiisalu najoqqutassat sumi pissarsiarineqarsinnaanerinit tunngasut aalajangersakkami erseqqissarneqarpoq. Kommunalbestyrelsip suliaanut tunngasunik tamat pissarsisinnaanerannik nukittorsaanarluni aalajangersakkami siunertaasoq naapertorlugu najoqqutassat kommunit illoqarfiini nunaqarfiinilu tamani kiisalu kommunip nittartagaani pissarsiarisinnaasunnagortinneqassapput.

§ 9-mut

Aalajangersagaq oqaasertaasigut iluarsivigalugu § 9-mik atuuttumik ingerlatitseqqinneruvoq allannagortitsisoqarnissaanillu eqqarsaateqartoqanngilaq.

Imm. 1-imut

Suleriaasissami nalinginnaasumi matup matuneqarnissaanik malittarisassanik ikkussisoqarsinnaavoq. Kommunalbestyrelsip nalinginnaasumik suleriaasissaani §1 imm. 2 naapertorlugu makku suliarineqarneranut atatillugu matunik matusineq atorineqassaaq:

- 1) Suliassat, inunnut ataasiakkaanut tunngasunik naliliisoqassatillugu
- 2) Suliassat illusinermt imaluunniit tunisinermut tunngassuteqartut
- 3) Missingersuutit imaluunniit neqeroorutit sanaartornermt tunngasut tunniutassallu

Imm. 2-mut

Aalajangersakkap kommunalbestyrelsi periarfissippaa inuit kommunalbestyrelsip avataaniittut kommunalbestyrelsip matoqqasumik ataatsimiinneranut aggersaasinnaangorlugit. Tamatumani piumasaaqatigineqarpoq pineqartoq suliarineqartumi paasissutissiisinnaassasoq pineqartorlu kommunalbestyrelsip akisussaassuseqartumik pisariaqartumik suliassami aalajangiinissaanut ilisimasaqartuussasoq.

Kommunimi sulisut kommunalbestyrelsip kiffartuunneqarnissaanik pisariaqartitsisoqartillugu ataatsimiinnermi matoqqasumi peqataasinnaapput. Aalajangersakkakut siunertarineqanngilaq inuit aalajangersakkap kingunerisaanik aggersarneqartut kommunalbestyrelsip kissaateqarnera malissallugu pisussaaffeqarnerisut malittarisassaqaqtitsinissaq, tamakkumi ataasiakkaarlugit aalajangiiffigineqartassammata pineqartullu inatsisit allat malillugit kommunalbestyrelsimut pisussaaffeqarneri aallaavigalugit.

Aalajangersagaq malillugu kommunalbestyrelsimut ilaasortaq attuumassuteqarnini pissutigalugu aalajangeeqataasinnaajunnaarsimasoq aggersarneqarsinnaassanngilaq.

Imm. 3-mut

Aalajangersakkap naqissuserpaa kommunalbestyrelsimi ilaasortanut, atorfilinnut, allanullu matoqqasumik ataatsimiinnermi peqataasunut nipangiussimasussaataaneq atuummat Kalaallit Nunaanni pinerluttulerinnermi Inatsit tunngavigalugu. Tamanna kommunalbestyrelsini matoqqasumi ataatsimiinnerni atuuppoq, taamattaaq aningaasaqarnermut ataatsimiititaliami, ataatsimiititaliani ataavartuni aamma immikkut ataatsimiititaliani isumalioqatigiissitalianilu atuulluni.

Imm. 4-mut

Aalajangersakkami Naalakkersuisunut innersuussisoqartillugu, Naalakkersuisut nammineerlutik pineqanngillat, kisiannili nakkutilliisoqarfimmit aallartitaannut ataatsimiinnerni matoqqasuni peqataasinnaatitaasut pineqarput. Ataatsimiinnerni matoqqasuni suliani peqataasinnaatitaaneq taamattaaq atuuppoq suliassaqaqfinni inatsisini immikkut nakkutilliisoqartussaanageranik aalajangiisimasoqartillugu, soorlu inunnik isumaginninnermut tunngasuni.

§ 10-mut

Aalajangersagaq § 10-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Pisarnertut suliat kommunalbestyrelsimit ataasiaannarlugit suliarineqartussaapput, immikkuullarissut inatsisitigut malittarisassaqaqtitaanngippata.

§ 11-mut

Aalajangersagaq § 11-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Kommunalbestyrelsi aalajangiisinnaassuseqarpoq ilaasortat affaat ataatsimeeqataappata allanik inatsisini allani allassimasoqanngippat. Piumasaqaataavoq ataatsimeeqataasuni aalajangertoqassatillugu amerlanerussuteqarnissaq.

Imm. 2-mut

Aalajangersakkami aalajangerneqarpoq aalajangersakkami § 15, imm. 1 naapertorlugu ilaasortaq ataatsimiinnermi ornigulluni peqataasinnaanngippat oqarasuaatikkut imaluunniit isiginnaarutitigut aammalu telefaxikkut ataatsimiinnermi peqataanissamut ilaasortaq periarfissaqartinneqartoq. Telefaxikkut piumasaqaat ilanngunneqarpoq aalajangiinnermi imaqarniliami atsiornissaq qulakkeerniarlugu.

Imm. 3-mut

Aalajangersakkami aalajangiunneqarpoq kommunalbestyrelsip suleriaatsimini maleruagassiorsinnaagaa ataatsimiinnerit oqarasuaatikkut ataatsimiinnertut, videokonference-tut allatulluunniit ingerlanneqarsinnaanerit. Aalajangersagaq aamma siunissamut qulakkeerinninniarnuvoq attaveqaatitigut teknologi atorneqarsinnaasussaq iluaqutigineqarsinnaasoq, minnerpaamilli isumannaarneqartariaqartoq ilaasortat isummernerisa tiguneqarnissaat ataatsimeeqataasunillu tamanit paasineqarnissaat. Peqatigitillugu isumannaarneqassaaq attaveqaatigiinnermut teknologi atorneqartoq aalajangiiffigineqartunik imaqarniliat atsiornissaannut periarfissaqartitsissasoq.

§ 12-mut

Aalajangersagaq § 12-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap kommunalbestyrelsimi ilaasortat kommunip allaffissornerani suliat inaarutaasumik ilusilinnik misissuisinnaanerit periarfissippai. Sulianut misissuisinnaanermut siunnersuut naapertorlugu taamaallaat tunniussisoqarsinnaavoq, kommunalbestyrelsimi ilaasortap ilaasortatut sulinerminnut atatillugu misissuinerani, aammalu suliassat naammassineqareersimasut pineqartillugit. Taamaalilluni pingaarnersiorlugu eqqartorneqarsimasunik, allakkianik taamaaqataanillu kommunip allaffissorneraniit tunniussisoqarsinnaanngilaq.

Imm. 2-mut

Aalajangersakkami naqissuserneqarpoq suliamik paasisaqarnissamik kissaateqarnerit borgmesterimut saaffiginnissutigineqartassasut.

Imm. 3-mut

Aalajangersakkami naqissuserneqarpoq borgmesterip sulianut paasissutissiisinaanermi itigartitsissuteqarsinnaasoq, sulianik kinguarsaasoqassappat, imaluunniit taamaaliorneq ajornartorsiutinik pilersitsisinnaappat. Annertuumik ajornartorsiuteqarsinnaanermut assersuutigineqarsinnaapput allakkatigut suliat ataatsimut inissisimangippata imaluunniit allakkatigut suliat annertoorujussuuppata.

Sulianut paasissutissiinermut itigartitsineq sunaluunniit toqqammavilersorluarsimassaaq.

Imm. 4-mut

Siunnersuut naapertorlugu suliamut atugassat nuutinneri qinnuteqartoqarneratigut nassiunneqassapput. Suliat nuutinnerinik tunniussinissamut kommunalbestyrelsi pisinnaavoq aalajangersaasinnaanissaminik. Aalajangersakkap kommunalbestyrelsi periarfissippaa suliamut nuutitanik tunniussinissami najoqqutassanik nalinginnaasunik aalajangersaasinnaalersillugu taamaalillunilu suliani aalajangersimasuni nuutitsinerit amerlassusaannik nalinginnaasunik killiliisinnaalersillugu.

Killiliineq taamaallaat nuutitat qassiusinnaanerinit attuumassuteqarpoq, taamaalillunilu nammineerluni ingerlatsivimmut ornigulluni suliamut attuumassutilinnik qimerluuisinnaanermut attuumassuteqarani.

§ 13-imut

Aalajangersagaq § 13-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Ilaasortap siunnersuutaanik apeqqutaanilluunniit suliaqarnissami kommunalbestyrelsip pisinnaatitaaffiginngisaaniippat imaluunniit siunnersuutip akuerineqarnerani aalajangiineq inerteqqutaappat kommunalbestyrelse itigartitsisussaataivoq. Taamaakkaluortoq ilaasortap siunnersuutaa apeqqutaaluunniit kommunip ileqqoreqqusai naapertorlugit piffissaq eqqorlugu tiguneqarsimasut borgmesterip itigartissinnaanngilai.

Erseqqissarneqassaaq kommunimi ataatsimiititaliat nammineerlutik oqartussaaffeqartinneqanngitsut, tamanna inatsisiliornermi erseqqissumik aalajangersarneqarsimatinnagu.

Aalajangiisinnatitaanermik piginnaatitaaffik kommunalbestyrelsimiippoq, taamaalillunilu ataatsimiititaliani nammineerluni aalajangiisinnaaffeqassappat tamanna inatsisitigut toqqammaveqartariaqarpoq.

§ 14-imut

Aalajangersagaq § 14-imik atuuttumik oqaasertaanik erseqqissaaviulluni ingerlatitseqqinneruvoq, allangortitsisoqarnissanillu eqqarsaateqartoqanngilaq.

Imm. 1-imut

Aalajangersagaq isigineqassaq pisortat ingerlatsinerat pillugu Inatsisartut inatsisaannut suliassani aalajangersimasuni soqutigisaqarneq pissutigalugu aalajangeeqataasinnaannginnermut pissutissaatitaasussanik aalajangersaaffiusumut atatillugu.

Ilaasortat ilaata suliassamut attuumassuteqarnera pissutaalluni aalajangeeqataasinnaannginneranik aalajangiineq amerlanerussuteqarnikkut aalajangerneqartassaaq.

Ilaasortat ilaata soqutigisaqarnini pissutigalugu aalajangeeqataasinnaannginnissaa pillugu apeqqut nakkutilliisutut oqartussaasut misilitassaraat, inaarutaasumilli aalajangiinnissaq eqqartuussisuniippoq nakkutilliisutut oqartussaasunut killilersuutinut Naalakkersuisutut pituttorsimangitsumi. Naalakkersuisut pisinnaatitaanngillat kommunalbestyrelsip suliamik ingerlatsinera naapertuunnersoq pillugu naliliissallutik, imaluunniit tamanna eqqortumik ingerlatseriaaseqarneq tunngavigalugu ingerlanneqarnera soq nalilissallugu, soorluttaaq kommunit aalajangiineranik atorunnaarsitsisinnaanermut Naalakkersuisut periarfissaannik killiliiffigineqartut.

Soqutigisaqarneq pissutigalugu aalajangeeqataasinnaannginnermut maleruagassanik nalinginnaasunik siunnersuut imaqanngilaq. Suliassamut soqutigisaqarneq pissutigalugu nalinginnaasumik aalajangeeqataannginnissamut tunngavissaqarnera soq pisuni ataasiakkaartuni pisortat maleruagassaataat nalinginnaasut naapertorlugit aalajangiisoqartassaaq.

Imm. 2-mut

Manna aalajangersagaq ilaasortap attuumassuteqarnera pissutigalugu aalajangeeqataasinnaannginnissaanut periusissamut aalajangersaavoq.

Aalajangersakkami aalajangersarneqarpoq, suliap suliarineqarnerani kommunalbestyrelsemi ilaasortaq ataasiakkaat nalunaaruteqartussaataasut, ilaasortap pineqartup attuumassuteqarnera pequtigalugu nalornisortoqalersinnaappat.

Imm. 3-mut

Aalajangersakkami siunertaavoq qulakkeerneqassasoq, ilaasortap ataatsip suliassamut attuumassuteqarneq pissutigalugu aalajangeeqataasinnaajunnaarsinneqarneratigut kommunalbestyrelsimi pissaanerup oqimaaqatigiinnerata nikisinneqartanninnissaa.

Ilaasortat ilaat suliassamut soqutigisaqarnini pissutigalugu aalajangeeqataasinnaatitaannginnermi saniatigut allamik peqquteqarluni najuutinngippat sinniisussap aggersarneqarnissaa pillugu apeqqut aalajangiiffigineqassaaq § 15 malillugu, ilaasortaq najuutinngitsoq suliassamut soqutigisaqarnini pissutigalugu aalajangeeqataasinnaatitaanngitsutut oqaatigineqassagaluarpuunniit.

Imm. 4-mut

Aalajangersakkami siunertaavoq qulakkeerneqassasoq, aalajangeeqataasinnaannginneq pissutigalugu sinniisussap aggersarneqarnissaa pillugu maleruagassat atornerlunneqannginnissaat, suliassami kommunalbestyrelsimi amerlanerussuteqarluartut aalajangiiviginiagaata aalajangiivigineqarnissaa pinngitsoortinniarlugu imaluunniit inatsisiliornerup imaluunniit isumaqatigiissutit inatsisitigut pisussaaffeqarfiusut pissutissaqartippassuk piffissap aalajangersimasup iluani aalajangiisoqarnissaa.

§ 15-imut

Aalajangersagaq maannamut § 15-imik atuuttumik oqaasertaanik erseqqissaaviulluni ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami pineqarpoq ilaasortap ataatsimiinnermut ataatsimut najuutinnginnissamut pisinnaatitaanera aamma sinniisussap ataatsimiinnermut ataatsimiigiaqquneqarsinnaanera. Suleqatigiit ilaasortamik qinigaasitsisimasut piunasaqaateqarsinnaapput sinniisussap ataatsimiinnissamut ataatsimut ataatsimiigiaqqusinissamut.

Tamatumani apeqqutaanngilaq suleqatigiit pineqartut kingusinnerusukkut atorunnaarsinneqarsimanersut imaluunniit allanngortinneqarsimanersut, tassa qinigaaqatigiissimasut akornanni sinniisussap ataatsimiigiaqquneqarnissaanik piunasaqaateqarnissaq isumaqatigiinnngissutaalissappat tamanna aalajangiivigineqartariaqarmat amerlanerussuteqartut aalajangiinerisigut.

Borgmesterip ataatsimiinnissamut nalinginnaasumik piareersaaneranut atatillugu ingerlaannartumik sinniisussamik aggersaasoqarneq ajorpoq. Tamatuma kinguneraa, kommunalbestyrelsimi ataatsimiinnissat piffissaalluartillugu suleqatigiit pilersaarusiortarnissaq sillimaffigisariaqaraat.

Naqissuserneqassaaq inissitsitissalluni ataatsimiinnissamut aamma kommunip missingersuusiaasa aappassaaneerlugit oqaluuserineqarnissaanut sinniisussamik aggersaatitsinissamik piumasaaqateqartoqarsinnaammat, naak peqataasinnaannginneq taaneqartunik peqquteqanngikkaluartoq, kisiannili assersuutigalugu kommunalbestyrelsimi ilaasortaq angallanneq pissutigalugu anngussinnaannginnera pissutigalugu. Tamanna pissuteqarpoq ataatsimiinnerni taakkunani pingaarutilerujussuarnik aalajangiivigisaqartarneq, taamaattumillu ilaasortap ataatsip najuutinnginneranik pissuteqartumik sunnerneqartariaqanngitsumik.

Imm. 2-mut

Aalajangersakkakut kommunalbestyrelsimiit aninissamik qinnuteqaatit pillugit qinnuteqarnermut pissutaasut paasissutissamik ilaqartinneqartarnissaannik qulakkeeriniartoqarpoq. Taamaalilluni erseqqilluinnartuussaaq qinnuteqaat anigallarnissamik qinnuteqaataanersoq aqutsinermi inatsimmi akissaateqarani sulinngiffeqarallerneq pillugu maleruagassat naapertorlugit pineqarnersoq imaluunniit qinersisarnermi inatsimmi maleruagassat naapertorlugit aninissamik qinnuteqaat pineqarnersoq.

Ilaasortap aninissani pisariaqartoq siumut takusinnaanngoruniuk sapinngisamik piaartumik borgmesterimut qinnuteqaat nassiutissavaa.

Ilaasortap ataatsimeeqataasinnaannginnerminik allakkatigut borgmesterimut nalunaaruteqarnissaanik pisussaaffilerneratigut siunnersuutigineqartumi borgmesterip sukkanerpaamik ilisimatinneqareernermitigut sinniisussamik piaarnerpaamik ataatsimiigiaqqusisinaanera periarfissinneqassaaq.

Aalajangersagaq peqqusivoq pissutissaqavilluni sivikinnerpaamik qaammatini marlunnik sivisussuseqartumik peqataasinnaannginnermi sinniisussamik ingerlaannartumik ataatsimiigiaqqusisinnissamik. Aalajangersagaq atuutilersinneqarnikuuvoq sinniisussanik ataatsimiigiaqqusisarnermi periutsit eqaannerulersinniarlugit paasinarsigaangat pissutissaqavilluni kommunalbestyrelsimi ilaasortatut isumagisassat piffissami sivisungaatsiartumi sivikinnerpaamillu qaammatini marlunni, imaluunniit agguaqatigiisillugu kommunalbestyrelsip ileqqusumik ataatsimiinnerini marlunni, sivisussuseqartussaasumik peqataaffigineqarsinnaanngippata.

Aalajangersagarli isigineqassanngilaq kommunalbestyrelsimi ilaasortat sulinngiffeqarallernermut assingusumik najuutinnginnissaminnut nalunaaruteqarnissaannut nalinginnaasumik tunngavissatut, tamannami kommunalbestyrelsimi ilaasortatut inuiaqatigiinni sullissisuuneranut akerliummat. Piffissami pissutissaqavilluni ataannartumillu najuussinnaanngikkallarneq pequtaasariaqarpoq. Assersuutigalugu piffissap ingerlanerani ilaasortaq ataatsimiititaliat ataatsimiinneranni najuuttarsinnaaguni kommunalbestyrelsip ataatsimiinnerini ataatsimeeqataanngitsoortarnissaanut pissutissaqanngilaq.

Akornutigisap pigallartuunera aalajangiisuunngilaq, tassami piffissap qinigaaffiup sinnerani ataatsimeeqataanngitsoortarnissap assigiinnassammagu ilaasortap kommunalbestyrelsimiit tunuarnissaata akuerineqarnissaa, tassalu:

1. sinniisussap kommunalbestyrelsimi ilaasortanngortinneqarnissaa
2. ilaasortap najuutinngitsup qinigaqaatigisimasaasa ataatsimiititaliani inissat inuttaqannngitsut inuttalissagaat.

Ilaasortaq kommunimi najukkaminiit nuukkallarpat kommuninut qinersisarnerni inatsimmi kommunalbestyrelsimiit tunuarnissaq pillugu maleruagassat malinneqartussaapput.

Kommunalbestyrelsimi qinikkat allattorsimaffianni allassimasut piunasaqarnerisigut imm. 1 naapertorlugu, imaluunniit borgmesterip imm. 2 naapertorlugu sulissuteqarneratigut sinniisussamik ataatsimiigiaqqusineqaraluarpulluunniit kommunalbestyrelsi pisussaavoq aalajangiivigissallugu sinniisussap ataatsimiigiaqquneqarnissaanut piunasaqaataasut naammassineqarsimanersut isummerfigissallugu. Pingaartumik pineqarput kommunalbestyrelsimi ilaasortap kingoraarneqartup najuutinngikkallarnissaanut pissutaasut tunngavissaqarnerisut imaluunniit sinniisussaq aggersarneqarsimanngippat tamanna pisariaqarnerisut.

Aalajangersakkap oqaasertai "aningaasarsiaqarani sulinnigiffeqarallarneq" imaluunniit "sulinnigiffeqarallarneq" aalajangiisuupput aqutsinermut inatsimmi malittarisassat malillugit sulinnigiffeqarallarnissamik qinnuteqarneq aamma kommunini qinersisarneq pillugu inatsimmi malittarisassat malillugit ilaasortaajunnaarnissamik qinnuteqarneq assigiinnigissuteqarmata.

Sulinnigiffeqarallarnissamik qinnuteqaammi pissutaasut tunuliaqutaasoq pillugu paasissutissaq ilaatinneqassaaq aamma tamatumunnga aporfiusutut pissutaasup qanoq sivilutiginissaa naatsorsuutigineqarnerisut.

Imm. 3-mut

§ 15, imm. 3-mi allannguut imm. 2-p oqaasertaasa malitsigisaannik sunniutaasumik iluarsissutaavoq. Taamatuttaaq ilaasortat sulinnigiffeqarallarsinnaatitaanerannut nalilersuinerisut tunngavissanik allanngortitsisoqarnissaa eqqaarsaataannngilaq.

Kommunalbestyrelsip aalajangiinera nakkutilliisutut oqartussaasunit misilinneqarsinnaatitaavoq, pisariaqartinneqarsimappallu eqqartuussivinnut ingerlateqqinneqarsinnaalluni.

Imm. 4-mut

Aalajangersakkap naqissuserpaa, sinniisussaq kommunalbestyrelsimi ilaasortap piffissami atorfissarisaminit pisinnaanninnerani taamaallaat atuuffeqassasoq.

Imm. 5-mut

Borgmesteritut qinigaasup piffissami sivisunerusumi peqannginnissaani kiap borgmesteritut atuunnissaa pillugu apeqqummi kommunalbestyrelsip pituttorsimanani aalajangiisinaanissaa siunnerfigalugu aalajangersagaq ilanngunneqarpoq.

Borgmesterip isumagisassaanik borgmesterip tulliata tiguisinnaanera, tak. § 22, taamaallaat pineqarpoq borgmesterip pisinnaanngikkallarnera qaammatinik sisamanik taakkuluunniit inorlugit sivisussuseqartussaasutut nalilerneqarpat.

Borgmesterip pisinnaanngikkallarnera qaammatinik sisamanik inorlugit sivisussuseqartussaasutut nalilerneqarnerata kingunerisaanik borgmesterimik nutaamik matumani aalajangersagaq malillugu qinersisoqarsimangippat, borgmesterimik qinersisoqassanngilaq borgmesterip najuutinngikkallarnera qaammatinik sisamanik sivisunerusumik sivisussuseqaraluarpalluunniit. Taamaattumik borgmesterimik nutaamik aatsaat qinersisoqassaaq kommunalbestyrelsip siumoortumik nalilerpagu borgmesteri piffissamit tassannga sivisunerusumik peqassanngitsoq. Malittarisassaq manna naapertorlugu borgmesterimik nutaamik qinersisoqarsimappat taanna borgmesterip najuutinngikkallarfiisaanut tamarmiusumut qinigaassaaq, taamaattumillu tunuartinneqarsinnaassanani, § 23-mi piunasaqaataasut naammassineqarsimangippata.

§ 16-imut

Aalajangersagaq § 16-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkakut aalajangiiffiqineqartunik imaqarniliap ilaasortanit ataatsimiinnermut peqataasimasunit ataatsimiinnerup kingornatigut atsiorneqarsimanissaa aalajangersarneqarpoq.

Aalajangersakkap naqissuserpaa immikkut isumallit imaqarniliamut ilanngunneqarsinnaasut.

Imm. 2-mut

Imaqarniliap ataatsimiinnerup kingorna atsiorneqarnissaa borgmesterip akisussaaffigivaa.

Imm. 3-mut

Siunnersuutikkut ilaasortat IT atorlugu periarfissat atorlugit atsiorsinnaatitaanissaat qulakkeerneqarsinnaassaaq, assersuutigalugu imaqarniliap assinga fax-ikkut atsiorsinnaallugu imaluunniit allatigut ilaasortap atsiornerata ilmuussusianik qulakkeerinnittoq.

Imm. 4-mut

Aalajangersakkami aalajangersarneqarpoq imaqarniliaq atsiorsimasoq kingusinnerpaamik qaammat ataaseq qaangiutsinnagu atsiorneqarnerata kingorna nakkutilliisutut oqartussanut nassiunneqassasoq.

§ 17-imut

Aalajangersagaq § 17-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Kommunalbestyrelsip ataatsimiinnerinut piareersaassalluni aggersaassallunilu borgmesterip akisussaaffigivaa. Ataatsimiinnissamut piareersaneq tassaavoq ullormut oqaluuserisassanik suliaqarneq aammalu kommunalbestyrelsimut ataatsimiinnermi suliaassanik ataasiakkaanik paasissutissanik suliarinnineq. Taamatuttaarlu borgmesteri pisussaavoq isumaqatigiinniarnit taasinerillu aqussallugit kiisalu aalajangiinnerit imaqarniliamut allanneqarnissaat isumagissallugu.

§ 18-imut

Aalajangersagaq § 18-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap naqissuserpaa borgmesteri suliani apeqquserneqarsinnaanngitsuni aalajangiisinnaasoq aammalu suliani kinguartinneqarsinnaanngitsuni aalajangiisinnaasoq. Piumasaqaataasoq taamaallaat naammassineqarsimassaaq, borgmesterip suliaq apeqquserneqarsinnaanngitsutut isigippagu aammalu nalileruniuk ilaasortat allat tamarmik suliaq apeqquserneqarsinnaanngitsutut isigineqassasoq. Naammassisassami aalajangersimasumi kommunalbestyrelsimi amerlanerussuteqartoqarnissaa qularnanngitsutut isigineqarpat borgmesterip nammineerluni suliaq aalajangiiffigisinnaavaa amerlanerussuteqarneq qularutigineqanngippat.

Assersuutigalugu suliaq kinguartinneqarsinnaanngitsutut taaneqarsinnaavoq illoqarfimmi ikuallannersuarmik nalaataqarnissamik ernumanartoqarpat, taamaalillunilu erngertumik ikiorserneqarnissamik pisariaqartitsisoqarpat.

Suliani apeqquserneqarsinnaanngitsuni assersuutigineqarsinnaavoq kommunalbestyrelsi suliamut assingusumut qanittukkut aalajangiissuteqarsimappat.

Imm. 2-mut

Aalajangersakkami aalajangerneqarpoq borgmesterip imm. 1 naapertorlugu aalajangikkat kingusinnerpaamik kommunalbestyrelsip ileqquusumik ataatsimiinnerani siullermi kommunalbestyrelsimut ilisimatitsissutigisassagai.

§ 19-imut

Aalajangersagaq § 19-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Kommunip allaffissornikkut ulluinnarni aqutsinera borgmesterimit ingerlanneqarpoq, borgmesterip akisussaaffigivaa kommunip suliassai naleqqunnerpaamik naammassineqartassasut. Borgmesterip suliassat naammassineqarnissaat siunertaralugu suliassat ingerlatsivinnut suliakkiutigeqqissinnaavai, taamaattorli borgmesterip suliassat naammassineqarnissaat pingaarnertut akisussaaffigivaa.

Kommunimut suliassanik nutaanik takkuttoqarpat ataatsimiititaliamut attuumassuteqartumut aqutsinermut ileqqoreqqusaaq naapertorlugu suliassa qarfiusumut qaninnerpaamut inissinneqassapput. Aqutsinermi ileqqoreqqusami suliassap inissinneqarnissaa nalornissutigineqartillugu kommunalbestyrelsi tamatumunnga aalajangiisariaqarpoq pisariaqarpallu aqutsinermi ileqqoreqqusami allanngortitsisariaqassaaq.

Imm. 2-mut

Aalajangersakkap naqissuserpaa borgmesterip akisussaaffigigaa aningaasaliissuteqartoqartinnagu aningaasartuuteqartoqassanngitsoq imaluunniit isertitaqartoqarsimassanngitsoq. Aningaasaliissut tassaavoq ukiumut missingersuummi aningaasartuutissatut aalajangiunneqarsimasoq.

§ 20-mut

Aalajangersagaq § 20-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap naqissuserpaa borgmesteri kommunip allaffissornikkut qullersatut akisussaasutut ataatsimiititaliani tamani ataatsimiinnerni peqataasinnaatitaasoq. Aalajangersakkap taamatuttaaq naqissuserpaa, ataatsimiititaliani ataatsimiinnermut ullormi oqaluuserisassanik aammattaaq imaqarnilianik borgmesteri nassinneqartassasoq.

Borgmesterip ataatsimiititaliani ataavartuni ataatsimiinnermi peqataasarnissaata avataatigut aammattaaq ataatsimiititaliaagallartuni aammalu siunnersuisoqatigiinni ataatsimiititaliani peqataasarnissaanut ilaavoq.

Imm. 2-mut

Aalajangersakkap naqissuserpaa, borgmesteri kommunip allaffissorneranut qullersatut inissisimanermigut ataqatigiissaarinermetik akiusussaasutut atuuffeqartoq. Aalajangersagaq suliani ataatsimiititaliap allap oqartussaaffigisaanut tunngasuni ataatsimiititaliap isumasioqatigiissuteqaqqaarfigisimasassaanut atatillugu isigineqassaaq.

Imm. 3-mut

Aalajangersagaq kommunip ingerlanneqarneranut atatillugu borgmesterip ataqatigiissaarisinnaaneramik nukittorsaaneremut atavoq. Borgmesteri akuliussinnaavoq suliani ataatsimiititaliani suliarineqartuni sulianilu allaffissornikkut suliarineqartuni. Pineqartumi kingullermi kommunalbestyrelsimut saqqummiussineq pisassaaq ataatsimiititaliaq attuumassuteqartoq aqqutigalugu, pisariaqarpallu aningaasaqarneremut ataatsimiititaliaq aqqutigalugu suliaq kommunimut aningaasatigut kinguneqartussaattillugu.

Akuliussinnaanermut pisinnaatitaaffiup atorneqarnera annertunerusumik tunngavilersortariaqanngilaq, taamaallaalli borgmesteri isummersimassaaq kommunalbestyrelsi suliamut isummertussaanaera pissusissamisuussasoq. Akuliussinnaanermut pisinnaatitaaffik assersuutigalugu atorneqarsinnaavoq suliaq tunngaviatigut isummernissamik ima imaqartigippat borgmesteri isumaqarpat suliarineqartoq kommunalbestyrelsimut isummerfigitittariaqarsoralugu imaluunniit aamma ataatsimiititaliap aalajangerneru borgmesterip isumaqatiginngippagu.

Ataatsimiititaliap aalajangiuppagu suliaq borgmesterip akuliuffigisimasaa ingerlateqqinniarnagu, taava kommunalbestyrelsimut saqqummiussisussaataaneq ataatsimiititaliap pisussaaffigisaa atorunnaassaaq. Tamatumani akornusissanngilaa kommunalbestyrelsimut ilaasortat suliamik kommunalbestyrelsimut saqqummiussisinnaanerat.

§ 21-mut

Aalajangersagaq § 21-mik atuuttumik ingerlatitseqqinneruvoq, allannortitsisoqarnissanillu eqqarsaateqartoqanngilaq.

Aalajangersagaq kommunit inatsisitigut pisussaaffigalugit isumaqatigiissuteqarsinnaanerisa atortussaassusiinut tunngassuteqanngilaq.

Inuk alla allagartanik inatsimmi aalajangersakkami taaneqartunik atsiortussaq pisariaqanngilaq kommunalbestyrelsimut ilaasortaasariaqartoq kommunimiluunniit atorfeqartariaqartoq, taannali pineqartoq taamaallaat isumaqatigiissuteqarsinnaasussaassaaq nammineersinnaaneremut iliuseqarsinnaanermullu piumasarisat nalinginnaasut naammassisimagunigit.

Inuit atsiortut kinaassusiannut uppersaaitit uppersaaitit takuneqarsinnaassapput kommunalbestyrelsi aalajangiinnermi imaqarniliaani.

§ 22-mut

Aalajangersagaq § 22-imik atuuttumik ingerlatitseqqinneruvoq, allangortitsisoqarnissaanillu eqqarsaateqartoqanngilaq.

Imm. 1-imut

Aalajangersagaq borgmesterip tullia sulineranut atatillugu maleruagassanut aalajangersaavoq.

Aalajangersakkami aalajangiiffigineqanngilaq qanoq pisoqartillugu borgmesteri tunuarallartassasoq, tamatumani pisut ataasiakkaat aalajangersimasut naliliiffigineri aallaaviusassammat. Borgmesterip aalajangertassavaa pineqartup suliassani qanoq ilinikkut suliarisinnaanngikkai.

Kommunalbestyrelsi ataatsimiinnerini borgmesterip borgmesterip tullia kissaateqarfigisinnaavaa ataatsimiinneq aqoqqullugu borgmesterip oqarasuaatikkut imaluunniit videokkut isiginnaarutikkut ataatsimiinneq aqukkusunngippagu.

Imm. 2-mut

Aalajangersakkami erseqqissarniarneqarpoq borgmesterip qaammatisiummi ulluni ikinnerpaamik 21-ni borgmesteritut suliassani ingerlassinnaanngippagit kommunalbestyrelsi borgmesterip tullia pisussaaffilersinnaagaa borgmesterip suliassani tamanik tigusinissaanik, allaffeqarfimmi aqutsineq taamalu aningaasaqarnermut ataatsimiititaliamut siulittaasuuneq ilanngullugit, taamalu pisoqartassalluni borgmesterip nammineq borgmesterip tullia qinnuvigisimannngippagu suliassani tigoqqullugit.

§ 23-mut

Aalajangersagaq § 23-mik atuuttumik ilaatigut ingerlatitseqqinneruvoq, Borgmesteri sakkortuumik arlaleriarlunilu suliassani suliariumannngippagit, kommunalbestyrelsi borgmesteri soraarsissinnaagaa siunnersuutigineqarpoq. Aalajangiineq atuuttussannngortinneqannginnermini Nakkutilliisoqarfimmit atuuttussannngortinneqassaaq.

Imm. 1-imut

Aalajangersakkami pineqarpoq suliassamik ataatsimik imaluunniit suliassat ikitsunnguusunik killeqartunillu borgmesteri suliarinninngikkusussanngippat. Taama pisoqarsinnaanera akuerineqarsinnaanngilaq, borgmesteri aalajangersimasumik akissarsiaqartinneqarpat. Aalajangersakkami borgmesterimut suliassaminik naammassinnikkusunngitsumut kommunalbestyrelsi immikkut akuliussinnaaneranut periarfissiivoq.

Imm. 2-mut

Borgmesterimik soraarsitsineq aatsaat pisinnaavoq borgmesteri annertuumik imaluunniit arlaleriarluni suliassaminik naammassinnikkusunngippat. Annertuumik imaluunniit arlaleriarluni suliassanik naammassinninngikkusunnginneq ima paasineqassaaq, piunasaqaatit taakkua marluullutik ataatsikkut naammassineqarsimasut soraarsitsinermik kinguneqartitsisoqassappat. Soorunami pisuni ataasiakkaani nalilersuisoqassaaq, naammassinninngikkusunneq qanoq annertutigissanersoq, soraarsitsinermik kinguneqartariaqarluni. Taamattaq naammassinninngikkusunneq annikinnerusoq kisiannili arlaleriarlugu naammassineqarusunngippat taamatut pisuni ataasiakkaani nalilersuereernikkut soraarsitsinermik kinguneqarsinnaanera naammassaaq. Kommunalbestyrelsip tunuartsinissamik aalajangiineraniit Nakkutilliisoqarfiup aalajangiinermik atuuttussanngortitsinissaata tungaanut borgmesteri tunuartinneqarallassaaq.

Imm. 3-mut

Aalajangersakkami aalajangerneqarpoq Nakkutilliisoqarfiup soraarsitsinermik aalajangerneq misilissagaat taamalu misissussallugu eqqortumik aalajangersimaneq tunngaveqarnersoq.

Imm. 4-mut

Soraarsitsinermik aalajangiineq eqqartuussisunut ingerlateqqinneqarsinnaanngilaq. Tamatumani kommunimi patajaatsumik aqutsisoqarnissaa qulakkeerniarlugu pivoq.

§ 24-mut

Aalajangersagaq § 24-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami siunertarineqartoq naapertorlugu kommunalbestyrelsi aningaasaqarnermut ataatsimiititaliamik pilersitsisussaataavoq.

Imm. 2-mut

Borgmesteri aningaasagarnermut ataatsimiititamut siulittaasussaataavoq. Aalajangersagaq borgmesterip taartissaanik toqqaasinnaatitsinngilaq.

Imm. 3-mut

Aalajangersakkami aningaasaqarnermut ataatsimiititaliami ilaasortat amerlassusilerneqarput. Ataatsimiititaliami qinersinermi naligiittoqarnissaa pinngitsoorniarlugu akunnattumik amerlassusiliisoqarpoq. Aalajangersakkamittaaq ilaasortanut tamanut, borgmesteri minillugu, taartissanik toqqaanissamik pisussaaffiliisoqarpoq. Tamanna pisussaaffik ilanngunneqarpoq

aningsaasaqarnermut ataatsimiititaliami ilaasortat nalinginnaasut tunuarpata ataatsimiititaliaq pisinnaajunnaarsinnaanissaa pinngitsoortinniarlugu.

Imm. 4-mut

Akerlianik immikkut ataatsimiititaliat, tak. § 32 imm. 8, aningsaasaqarnermi ataatsimiititaliamut qinikkat kommunalbestyrelsimi ilaasortaasussaapput, tamanna peqquteqarpoq ataatsimiititaliaq inatsit naapertorlugu kommunalbestyrelsi sinnerlugu aalajangernissamik piginnaatitaammat, akerlianillu immikkut ataatsimiititaliat taamaallaat killilimmik piginnaatitaaffeqarmata sulianut aalajangersimasunut atatillugu imaluunniit kommunalbestyrelsimut, aningsaasaqarnermi ataatsimiititaliamut imaluunniit ataatsimiititalianut ataavartunut piareersaanernik suliaqartarmata imaluunniit siunnersuineramik ingerlatsisarmata.

Aalajangersakkap naggataata ersarissarpaa, ataatsimiititalianut inunnik qinersinerni kommunalbestyrelsi toqqaasinnaanngitsoq qinigaanerit kommunalbestyrelsip atuuffianit sivikinnerusumik atuuffeqartussanik.

§ 25-imut

Aalajangersagaq § 25-mik atuuttumik ingerlatitseqqiineruvoq, imm. 4 manna tikillugu ileqqooreersunik inatsimmut ilanngussinerusoq minillugu.

Imm. 1-imut

Aningsaasaqarnermut ataatsimiititaliaq Inatsisartut inatsisaat malillugu inatsisitigut pisussaaffigalugu kisiartaalluni ataatsimiititaliaammat eqqortuliornerpaanerussasoq isumaqartoqarpoq aningsaasaqarnermut ataatsimiititaliap suliassai toqqaannartumik Inatsisartut inatsisaanni allaaserineqarpata atuutsinermut ileqqoreqqusamiunngitsoq.

Aalajangersakkap qulakkeerpaa aningsaasaqarnermi ataatsimiititaliaq ataqatigiissaarinissaq eqqarsaatigalugu piginnaassutsinik sakkortuunik piginnaatitaassasoq, taamaalilluni immikkoortualukkaartumik aqutsisoqalinnginnissamik ineriartortoqalernissaa pinngitsoorumallugu. Pingaaruteqarpoq aningsaasaqarnermi ataatsimiititaliami aamma kommunalbestyrelsimi kommunip suliassaani amerlasuuni tamakkerlugu isiginninnermik qulakkeerisoqassasoq taamaalilluni suliassat pimoorussamik tulleriarsinnaaneramik periarfissaqarsinnaaqullugu.

Nr. 1 pillugu: Aalajangersakkap naqissuserpaa aningsaasaqarnermi ataatsimiititaliaq ataqatigiissaarisutut ingerlatsiviusoq aammalu naqissuserlugu aningsaasaqarnermi ataatsimiititaliap oqaaseqaatai aningsaasaqarnermi suliani tamani aamma allaffissornermi suliani piniarneqartassasut tamakkua kommunalbestyrelsip aalajangiunneqarnissaanut saqqummiunneqartinnagit.

Nr. 2 pillugu: Aalajangersagaq ilaatigut kommunit ingerlatsinerannik atuuttumik naqissuseqqiineruvoq, ilaatigullu kommunip aqunneqarnerani kommunaldirektøritut atorfik qanoq pingaaruteqartigineranik erseqqissaassutaalluni.

Nr. 3 pillugu: Aalajangersakkap naqissuserpaa aningaasaqarnermi ataatsimiititaliaq kommunip suliassaani tamani karseqarnermut aamma naatsorsuuserinermut attuumassutilinnut suliassanut tamanut akisussaasuusoq aammalu Naalakkersuisut konto-t ingerlannerinik maleruagassanik atuuttuni aalajangersagaanni eqqortitsinissap qulakkeerneqarnissaa ilanngullugu.

Nr. 4 pillugu: Aalajangersakkami aningaasaqarnermut ataatsimiititaliaq aningaasaqarneq pillugu pilersarusiornissamut tunngavissiorinissamut pisussaaffilerneqarpoq. Taamaattumik kommunalbestyrelsimi ataatsimiititaliat allat ingerlatsinerminni tunngaviit taakku pisussaaffigissavaat.

Nr. 5 pillugu: Aningaasaqarnermut ataatsimiititaliaq peqquneqassaaq nalinginnaasumik ileqqoreqqusanik aalajangersaaqqullugu. Ataatsimiititaliat allat aalajangiineranni malitassat taakku pinngitsooratik malitassaapput.

Imm. 2-mut

Aalajangersakkami aalajangersarneqarpoq aningaasaqarnermut ataatsimiititaliap piginnaatitaaffii annertusineqarsinnaasut aamma ingerlatsiviit allat oqartussaaffii ilaatilerlugit. Kommunalbestyrelsi aqutsinermik ileqqoreqqusani aalajangiislinnaavoq assersuutigalugu inuussutissarsiornermut suliassat tunngassuteqartut aningaasaqarnermi ataatsimiititaliami ingerlanneqarsinnaasut. Ingerlatseriaaseq tamanna kommunalbestyrelsip qinerpagu ataatsimiititaliaq taagorneqassaaq inuussutissarsiornermut aamma aningaasaqarnermut ataatsimiititaliaq.

Imm. 3-mut

Missingersuusiorneq kommunimut annertuumik pingaaruteqarmat, aalajangersakkami kommunalbestyrelsimut ilaasortat, aalajangersakkami aningaasaqarnermut ataatsimiititaliamut ilaasortaangitsut missingersuusiornermut atatillugu apeqqutinut paasisaqarsinnaanerunissaat siunertarineqarpoq.

Imm. 4-mut

Aalajangersakkap naqissuserpaa nalinginnaasumik § 16-imut innersuussinikkut ikinnerussuteqartut pisussaaffiini aammattaaq kommunalbestyrelsinimi imaqarnilianut tunngatillugu aamma aningaasaqarnermut ataatsimiititaliami atuuttuusoq. Aammattaaq § 16-imut innersuussuttip naqissuserpaa imaqarniliaq atsiorneqarneraniit kingusinnerpaamik qaammat ataaseq qaangiutsinnagu Naalakkersuisunut assilineranik nassitsisoqassasoq.

§ 26-imut

Aalajangersagaq § 26-imik atuuttumik aqqissuussaana allannguiffigalugu ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq kommunit nammineerlutik ataatsimiititaliat aaqqissuuneqarnerannik pilersaarusiussasut suliat naammassineqarnissaannut immikkut inatsiseqarnermi piumasqaataasut naapertorlugit.

Aalajangersakkap kinguneranik aqutsinermi ileqqoreqqusaq nalinginnaasoq ataatsimiititaliat ataavartut taakkualu suliassaannik malittarisassanik ataasiakkaanik imaqanngilaq, kisiannili Naalakkersuisut nakkutilliisutut oqartussatut aqutsinermik ileqqoreqqusat kommunini ataasiakkaani immikkut inatsiseqarneq naapertorlugu pisussaaffiit akerliunersut misissorsinnaassavaat.

Imm. 2-mut

Aalajangersakkami ataatsimiititalianut ataavartunut ilaasortatut qinerneqartussat amerlassusaat aalajangersarneqarput. Aalajangersakkami siunertarineqartup aningaasaqarnermut ataatsimiititaliap katitigaaneranut aalajangersagaq assigaa, pissutigalugu maani aalajangiisinnaanermut siunertap assinga atuummat.

Imm. 3-mut

Aalajangersakkami aalajangerneqarpoq ataatsimiititaliani ataavartunut qinersineq aningaasaqarnermi ataatsimiititaliamik qinersinerup kingorna pissasoq.

§ 27-mut

Aalajangersagaq § 27-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Ataatsimiititaliani ataavartuni ilaasortaasut tamarmik ataatsimiititaliami siulittaasutut qinerneqarsinnaanermik pisussaaffeqarput.

Imm. 2-mut

Aalajangersakkap siunertaraa ataatsimiititaliap sulinera eqaannerusumik ingerlanneqarsinnaanissaa, minnerunngitsumik ataatsimiititalianut ataatsimiinnissamik aggersaaneq ilaatigut ajornartorsiuteqarfiusinnaammat, assersuutigalugu ataatsimiititaliamik ilaasortat nunaqarfimmi najugaqarpata.

Aalajangersakkami naqissuserneqarpoq ataatsimiititaliap siulittaasuata sulianik aalajangiisinnaanera, ataatsimiititaliamut ataavartumut saqqummiunneqartussaagaluartumut. Ataatsimiititaliami ataavartumi siulittaasoq kommunip allaffissornerata ilaanut ulluinnarni

aqutsisutut assersuuneqanngilaq taamaalillunilu aalajangersakkap ataavartumik ataatsimiititaliap piginnaatitaaffiata aammalu borgmesterip allaffissornermi ulluinnarni aqutsisuatut pisinnaatitaaffiisa killiinik allannqortitsinngilaq.

Ataatsimiititaliap ataavartup siulittaasua sulianik nukinginnartunik aammalu suliani apeqquserneqarsinnaanngitsuni aalajangiisinnaanermik piginnaatitaaffiup avataatigut tunineqarusuppat, tamanna ataatsimiititaliap ilaasortat tamarmik isumaqatigiissutigippassuk pisinnaavoq.

Suliani oqariaatsip "apeqquserneqarsinnaanngitsoq" nassuiarneqarnerani piumasaqaataavoq, ataatsimiititaliap siulittaasuata nalilissagaa, ataatsimiititaliami ilaasortat tamarmik, tassalu amerlanerussuteqartuinnaanngitsut suliaq apeqquserneqarsinnaanngitsutut isigissagaa.

Aalajangersagaq suliassani nukinginnartuni pisoqartillugu borgmesterimut ilisimatitsisussaataaneq toqqammaveqarpoq borgmesterip ataqatigiissaarinissamut periarfissinneqassammat aammalu ataatsimiititaliap ataavartup ingerlatsineranut borgmesterip akuliunnissaanut pisinnaatitaaffeqarneranik toqqammaveqarpoq.

Imm. 3-mut

Aalajangersakkap ersarissarpaa siulittaasutut immikkut piginnaatitaaffiit ataatsimiititaliat aqunneqarneri toqqammaviatigut allannqortinneqanngitsut. Taamaalillunilu siulittaasoq ataavartumik ataatsimiititaliat aalajangiinerannik malinnittussaavoq.

Ataatsimiititaliamut atatillugu siulittaasup suliassarai ataatsimiinnerit piareersarneri, ataatsimiinnerni aggersaaneq, ataatsimiinnerni aqutsineq il.il.

§ 28-mut

Aalajangersagaq § 28-mik atuuttup ilaanik ingerlatitseqqinneruvoq. Allaffissornikkut ikiorsiineq qanoq ilusilik ataatsimiititalianut ataavartunut atugassiissutigineqassanersoq borgmesterip aalajangertassagaa siunnersuutigineqarpoq.

Imm. 1-imut

Aalajangersakkap naqissuserpaa ataatsimiititaliat sulinerat ataatsimiinnerni ingerlanneqassasut.. Tele atorlugu attaveqaatinik teknologi atorlugu aalajangersakkanik peqartoqanngilaq taamaattumillu ataatsimiititaliat ataasiakkaat pisut ataasiakkaat naapertorlugit naliliisassapput suut tele-kkut attaveqaatitigut teknologi atorneqartassanersut.

Imm. 2-mut

Suleriaasissamik maleruagassaqartoqarnissaanik piumasaqaat ima isumaqanngilaq kommunalbestyrelsip suleriaasissatut maleruagassaata assinganik allassimasumik

suleriaaseqartoqassasoq. Aalajangersagaq pingaarnerusutigut isumaqarpoq kommunalbestyrelsi ataatsimiititaliap ataavartup isumaqatigiinniarninut periaasissanikakuersissuteqarsinnaanngitsoq.

Imm. 3-mut

Aalajangersakkap naqissuserpaa nalinginnaasumik § 16-imut innersuussinikkut ikinnerussuteqartut pisussaaffiiniq aammattaaq kommunalbestyrelsinu imaqarnilianut tunngatillugu aamma ataatsimiititaliami atuuttusoq. Aammattaaq § 16-imut innersuussutip naqissuserpaa imaqarniliaq atsiorneqarneraniit kingusinnerpaamik qaammat ataaseq qaangiutsinnagu Naalakkersuisunut assilineranik nassitsisoqassasoq.

Imm. 4-mut

Aalajangersakkap naqissuserpaa qaqugukkut ataatsimiititaliami ilaasortaannigitsut ataatsimiititaliap ataatsimiinnerini najuussinnaatitaasut, tassami aallaaviummat ataatsimiititaliani ataatsimiinnerit matoqqasuuneri.

Aalajangersakkap ataatsimiititaliaq periarfissippaa ingerlatsisoqarfimmi ikiorsiinissamik piumasaqarsinnaalersillugu, kisiannili borgmesterip allaffissornermi ulluinnarni qullersatut aqutsisutut, pisariaqarpat ataatsimiititaliaq pineqartoq tusarniareerlugu aammalu ataatsimiititaliap siulittaasua oqaloqatigereerlugu, aalajangissallugu allatseqarnermi ikiorteqarneq sorleq ikiorsiissutaassanersoq aalajangissallugu.

Ataatsimiititaliaq ataavartoq aamma atorfilinnik aggersaasinnaavoq paasissutissanik oqaatsitigut nassuiaassinissaq imaluunniit assigisaanik tigusaqarnissaq siunertaralugu. Ataatsimiititaliaq ataavartoq ataatsimiititaliami ataavartoq atorfilinnik peqataasoqarnissaanik akuersissummik nalinginnaasumik tunisisinnaanngilaq. Atorfillit ataatsimiititaliap ataatsimiinneranut paasissutissiissallutik aggersarneqartut ataatsimiinnerni pisussaataapput peqataassallutik, kommunalbestyrelsi imaluunniit borgmesteri allamik aalajangersimannigippat.

Aalajangersakkami aamma pineqarpoq atorfilittaannigitsut ilaatigut kommunalbestyrelsimi ilaasortat allat ilanngullugit, ataatsimiititaliani peqataasinnaatitaaneri. Aalajangersakkap erseqqissarpaa inuit pineqartut taamaallaat ataatsimiititaliap ataatsimiinnerinut aggersarneqarsinnaasut suliame aalajangersimasumik paasissutissiinnissaannik toqqammaveqarpat. Akerlianik kommunimi atorfilinnut, atorfeqartuunngitsut ataatsimiititaliat ataavartut isumaqatigiinniarneri najuuffigisinnaavaat taasisitsinerilli najuuffigisinnaanagit.

Aalajangersakkami anguniarneqarpoq ataatsimiititaliani ataatsimiinnerit sulisuunngitsuniit peqataaffigineqarnissaat killilersorneqassasoq minnerunngitsumik anguniarlugu ataatsimiititaliat ataatsimiinnerini ataatsimiititaliami ilaasortat kommunalbestyrelsimi ilaasortaasut avataatigut peqataasanninnissaat, taamaalillugu isumaqatiginninniarneri kommunalbestyrelsip

ataatsimiinnerini ammasuniit ataatsimiititaliami ataatsimiinnerni matoqqasusunut nuunneqarnissaat ernumassutigineqarsinnaammat.

Imm. 5-mut

Aalajangersakkami pineqarpoq kommunit aalajangeeriaasaat aammanerulernissaannik kissaateqarneq tunulequtaralugu.

§ 29-mut

Aalajangersagaq § 29-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq ukiumut missingersuummi akuerineqartumi killiliunneqartut iluanni ataatsimiititaliap ataavartup susassa qarfini pisussaaffigissagai.

Imm. 2-mut

Aalajangersakkakkut aalajangerneqarpoq ataatsimiititaliaq ataavartoq ataatsimiititalianik attuumassuteqartunik isumaqatiginninniartassasoq, ilaatigut aningaasaqarnermut ataatsimiititaliamik, ataatsimiititalianik ataavartunik allanik aammalu ataatsimiititaliat allat aalajangiisoqartinnagu isumaqatigiinniartassagai. Pisariaqartillugu ataatsimiititaliap ataavartup isumaqatiginninniartoqartillugu pisariaqalerpat borgmesteri isumaqatiginninniarnerni ilanngutsissinnaavaa.

Imm. 3-mut

Aalajangersakkakkut aalajangerneqarpoq tamanna kissaatigineqaraangat ukiumut missingersuutitut aammalu missingersuusianut siunnersuutitut ataatsimiititaliaq ataavartoq ilanngussisassasoq. Ataatsimiititaliaq ataavartoq ilanngussa qar nissaminut pisussaavoq aningaasaqarnermut ataatsimiititaliap tunniussinissamut killissarititaa tikitsinnagu.

§ 30-mut

Aalajangersagaq § 30-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Aalajangersakkami aalajangerneqarpoq ataatsimiititaliami ilaasortaq kinaluunniit kommunalbestyrelsimut sulia sanngortitsisinnaasoq, taamaalillugulu aalajangiisinnaassuseq ataatsimiititaliamiit nuussinnaallugu.

§ 31-mut

Aalajangersagaq § 31-imik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap kommunalbestyrelse aaqqissukkanut oqaloqatigiiffinnullu kommunit kommunalbestyrelsilluunniit sinniisoqarfigisassaannut ilaasortassanik toqqaasusssanngortippaa. Assersuutaasinnaapput ingerlatsivinni imminnut pigisuni siulersuisut pisortanit sinniisullit.

Imm. 2-mut

Aalajangersakkakut aalajangiunneqarpoq ataatsimiititaliami ataavartumi qinersinerup kingorna ataatsimiititalianik allanik, isumalioqatigiissitani il.il. qinersisoqassasoq.

Aalajangersakkap naggataani § 24, imm. 4-mi aalajangersarneqartoq naapertorlugu kommunalbestyrelsi ataatsimiititalianut il.il. inunnik qinersinerni aalajangiisinnaanngitsoq qinigaaffiit kommunalbestyrelsip atuuffianiit sivikinnerusumik atuutissasut.

Imm. 3-mut

Ataatsimiititalianut il.il. § 31, imm. 1-imi taaneqartunut tunngatillugu kommunalbestyrelsi kommunalbestyrelsimi ilaasortaannngitsunik allanik ilaasortassatut toqqaasinnaanngillat, tamanna inatsisitigut tunngavissaqanngippat. Kisiannili kommunalbestyrelsi inatsisinik allanik immikkut ittumik tunngaveqarani kommunalbestyrelsimi ilaasortaannngitsunik, imm. 1-imi taaneqartut saniatigut sulialinnik toqqaasinnaavoq.

§ 32-imut

Aalajangersagaq § 31a-mik atuuttup ilaanik ingerlatitseqqinneruvoq. Kommunalbestyrelse najukkani ataatsimiititalianik pilersitsinissaa aningaasanillu siunertanut aalajangersimasunut akuerineqarnikkut atorsinnaasaannik tunniussinissaa siunnersuutigineqarpoq. Siunnersuutigineqarportaaq najukkani ataatsimiititaliani ilaasortat akissarsiaqarsinnaassasut. Aamma allannguisoqarnissaa siunertarineqanngilaq.

Imm. 1-imut

Kommunalbestyrelse kommunigisami kommunip ingerlatsiviata qullersaqarfiginngisaannut illoqarfinnut tamanut najukkani ataatsimiititalianik pilersitsinissasoq siunnersuutigineqarpoq. Aalajangersagaq Naalakkarsuisut kommunini innuttaasut ataasiakkaat najukkaminnut tunngasunik aalajangeeqataasinnaanissaannik kissaateqarnerannik pissuteqarpoq.

Imm. 2-mut

Aalajangersakkami kommunalbestyrelse najukkami ataatsimiititaliat qinersinissaannut maleruagassiortussaatinneqarput.

Imm. 3-mut

Siunnersuutigineqarportaaq kommunalbestyrelse najukkani ataatsimiititalianut suliassanik aalajangiisinnaassutsinillu aalajangersimanerusunik tunniussaqaarsinnaasoq.

Imm. 4-mut

Aalajangersakkakkut siunnersuutigineqarpoq kommunalbestyrelsi aningaasanik atugassanngortitsisussanngortitaassasoq najukkani ataatsimiititaliat tamanut ammasumik tusarniaanernut, kulturimut, timersornermut inuillu sammisaqartinneqarnerinut atorsinnaasaannik. Aningaasanit atugassiisutigineqartunit qanoq amerlatigisut najukkani ataatsimiititaliat ataasiakkaat suliassaqaarfinnut taaneqartunut sisamaasunut immikkut atuinissamut periarfissinneqassanersut, tassalu suliassaqaarfiit immikkut tamarmik qanoq annertutigisumik atugassinneqarnissaannik annertussusiliilluni kommunalbestyrelsip aalajangersinnaavaa, kisiannili aamma aningaasat atugassiisutaasut ataatsimoortumik najukkani ataatsimiititalianut ataasiakkaanut, suliassaqaarfinnut sisamaasunut nammineerluni atugassatut aningaasaliissutiginiarlugit aalajangiisinnaalluni. Aalajangersagaq najukkani ataatsimiititaliat piginnaatitaaffiisa nukittorsarneqarnissaattut isigineqassaaq.

Kommunip nunaqaarfinnut aqutsisunut najukkanilu ataatsimiititalianut aningaasat atugassatut immikkoortitsineratigut kommunalbestyrelsit susassaqaarfinnut inatsit naapertorlugu pisussaaffii atuutiinnassapput.

Imm. 5-mut

Najukkani ataatsimiititaliat kommunalbestyrelsimut, aningaasaqaarnermut ataatsimiititaliamut ataatsimiititalianullu ataavartunut piareersaasutut aamma/imaluunniit siunnersuisartutut inissisimasinnaanerat siunnersuutigineqarpoq.

Imm. 6-mut

Siunnersuummi imm. 2-mut uiggiullugu siunnersuutigineqarpoq kommunalbestyrelsi najukkani ataatsimiititaliat sulinerannut malittarisassanik aalajangersaassasoq, taamatuttaaq ataatsimiinnernit allaganngorlugu imaqaarniortussaataitaanerannut, naatsorsuuteqartussaataitaanerannut missingersuusiornissamullu.

Imm. 7-mut

Siunnersuutigineqarpoq kommunalbestyrelsi § 56, imm. 6 naapertorlugu najukkani ataatsimiititalianut ilaasortaasut akissarsiaqartitsisinnaassasoq.

Imm. 8-mut

Siunnersuutigineqarpoq kommunalbestyrelse apeqqutip suliarineqarnerani immikkut ilisimasalinnik najukkamulluunniit ilisimasalinnik peqataatitsisoqarnissaanik pisariaqartitsisoqartoq naliliisoqarpat immikkut ataatsimiititalianik suliat aalajangersimasut suliarineqarnissaannut pilersitsisinnaassasoq.

Imm. 9-mut

Siunnersuutigineqarpoq najukkani ataatsimiititaliat piffissamut killilikkamut pilersinneqarsinnaassasut. Taamaalilluni kommunalbestyrelsip nammineq aalajangissavaa najukkami ataatsimiititaliap piffissaq atuuffissaa qanoq sivisutigissanersoq. Aalajangersakkap kinguneraa assersuutigalugu kommunalbestyrelse aalajangersinnaasoq najukkami ataatsimiititaliaq ukiumut ataasiarluni pilerseqqinneqartassasoq.

Imm. 10-mut

Aalajangersagaq nutaajuvoq. Siunnersuutigineqarpoq kommunalbestyrelse najukkami ataatsimiititaliamik pilersitsissanngitsoq qinigassanngortittoqarsimassanngippat.

Imm. 11-mut

Kommunalbestyrelsip najukkani ataatsimiititaliat ingerlatsinerannik nakkutilliisussaanaera aalajangersakkami erseqqissarneqarpoq.

Nakkutilliinermi oqartussaasoq najukkani ataatsimiititalianik toqqaannartumik nakkutilliinissamut periarfissaqartussaannngilaq, kisiannili nakkutilliineq kommunalbestyrelsi aqutigalugu ingerlattussaallugu. Naalackersuisut suliaq ataaseq, najukkami ataatsimiititaliami suliarineqartoq pillugu paasissutissinneqarnissaminnik kissaateqarpata, Naalackersuisut tamatigut kommunalbestyrelse iserfissarissavaat. Kommunalbestyrelsip piginnaatitaaneq najukkami ataatsimiititaliamut suliakkiissutigissavaa, kisiannili taamaaliornikkut aningaasaliissutit suliakkiinerlu naapertorlugit ingerlatsisoqarnissaanut akisussaaffini iperarsinnaanngilaa.

§ 33-mut

Aalajangersagaq § 32-imik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Siunnersuummi kommunalbestyrelsi periarfissinneqarpoq aqutsinissaq kissaatigineqartoq aqqissuutissallugu inatsisip § 24-at aamma § 25-at killiliisoralugit, piumasaqaatini aningaasaqarnermut ataatsimiititaliaq aalajangersimasunik suliaasaqarnermi kommunip pisariaqartitaanik aqutseriaatsimik aqqissuussisinnaasoq. Aqutseriaaseq aqutsinermik ileqqoreqqusani aalajangersarneqassaaq, tak. inatsimmi § 1, imm. 2.

§ 34-imut

Aalajangersagaq § 33-mik atuuttumik ingerlatitseqqinneruvoq, allannortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq kommunalbestyrelsip qinigaaffiup iluani ataatsimiititaliaqarnerup iluseqartinneqarnera, ataatsimiititaliani ilaasortat amerlassusiat imaluunniit ataatsimiititaliat suliassaar allannortissinnaagai suliat ingerlanneqartarneranni malittarisassani § 1, imm. 2 aqutsinermut ileqqoreqqusap allannortinneqartarnerinut maleruagassat tunngavigalugit.

Imm. 2-mut

Kommunimi ataatsimiititaliaqarnerup iluseqartinneqarnerata allannortinneqarnera pissaaq § 1, imm. 2 naapertorlugu taamaalillunilu marloriarlugu sularineqassalluni.

Imm. 3-mut

Ataatsimiititaliat iluseqartinneqarneranni allannuutigittinneqartut aningaasaqarnermut ataatsimiititaliap aammalu ataatsimiititaliat ataavartut aqqissugaanerannut annertuumik sunniuteqarput taamaasilluni ataatsimiititaliat amerlassusaar allannortittariaqarluni kommunalbestyrelsimi ilaasortap ataasiinnaap kissaatigippagu. Nutaamik inissitsiteqqinnermi periarfissaqassaaq taaseqatigiikkumallutik suleqatigiinnik nutaanik nalunaartoqarnissaanut.

§ 35-mut

Aalajangersagaq allassimaneratigut allannortitsivigalugu § 34-mik atuuttumik ingerlatitseqqinneruvoq allannortitsisoqarnissaanillu eqqarsaateqartoqanngilaq.

Aalajangersakkami aalajangerneqarpoq kommunimi ataatsimiititalianut allanullu ilaasortaaneq pinngitsoorani qinikkatut sullissinissamut pisussaaffiusoq.

§ 36-mut

Aalajangersagaq § 35-mik atuuttumik ingerlatitseqqinneruvoq, allannortitsisoqarnissaanillu eqqarsaateqartoqanngilaq.

Imm. 1-imut

Aalajangersakkakkut aalajangerneqarpoq ataatsimiititaliamut ilaasortanik marlunnik amerlanerusunilluunniit qinersisoqartillugu ilaasortaataqartut qanoq amerlatigisunik ilaasortaqaassusiat naapertorlugu kisitsisit agguarnerat naapertorlugu naatsorsueriaaseq atorlugu qinersineq ingerlanneqassaaq ataatsimiititaliani tamani immikkut atorineqartassasoq. Tamanna aamma isumalioqatigiissitanut, siulersuisunut, il.il. atuuppoq.

Imm. 2-mut

Aalajangersakkakut aalajangerneqarpoq ataatsimiititaliani borgmesterip ilaasortaaffiginngitsuugassarinnngisaani amerlassutsit eqqarsaatigalugit qinigaaffimmi suleqatigisaminut borgmesteri ilaatinneqartassasoq. Ilaasortaqaassuseq naapertorlugu qinersinermi erserpat borgmesterip qinigaaffimmi suleqataasa pingasuusariaqarnerat taava ilaasortassanik marlunnik qinersisoqartassaaq. Eqimattami pingasunik ilaasortaqaassappat, marlunnik ilaasortanik allanik ataatsimiititaliamut qinersisoqassaaq. Tamanna aamma isumalioqatigiissitanut, siulersuisunut, il.il. atuuppoq.

Imm. 3-mut

Aalajangersakkami iluarsiiiffiqineqarput kommunalbestyrelsimi ilaasortamik aamma ilaasortaannngitsunik ataatsimiititalianut assigisaannullu qinersisarnermi pissutsit.

Kisitsisit agguarnerat naapertorlugu qinersinermi inunnik arlalinnik qinersinermi tunngaviummik naatsorsuutigineqassaaq, qinigaasussat tamarmik naligiisinneqarsimassasut ima, qinigassakkuutaat tamarmik inissamminnik inuttaliiniarnerminnut pisinnaatitaaffigisaminik assigiimmik kiffaangissuseqassasut. Tamatuma malitsigisaanik suleqatigiiaat inissanik imaluunniit inissamik kingullermik inissittoqartussaattillugu qinersisinnaanermut periarfissaat killeqarnerulersinnaapput, ilaasortat aalajangersimasut nungussimasinnaammata. Aalajangersagaq assersuutigalugu ataatsimiititalianut § 31, imm. 3 naapertorlugu pilersinneqartut katiterneqarnissaannut attuumassuteqarpoq.

Imm. 4-mut

Aalajangersakkami ingerlateqqinneqarpoq ilaasortaataitaqartut qanoq amerlatigisunik ilaasortaqaassuasiat naapertorlugu kisitsisit agguarnerat naapertorlugu naatsorsueriaaseq atorlugu qinersisarnermi periuseq d'Hondts-ip periusaanik taaneqartartoq. Aalajangersagaq malittarisassamik ilassuserneqarpoq, kattusseqatigiit inissamik inuttaqannngitsunik inuttaleerusunngippata taava inissaq kattusseqatigiinnit allanit d'Hondts-ip periusaa malillugu pissarsiarineqartassaaq.

§ 37-mut

Aalajangersagaq § 36-mik atuuttumik ingerlatitseqqinneruvoq, allannngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq qinigassannngortittumik ataatsimik qinersinermi amerlanerussuteqartoqassasoq. Qinigassannngortittut ilaannaalluunniit siullermeerluni taasinermi amerlanerussuteqartunit taaneqanngippat, taaseqqittoqassaaq. Taasinikkut tamatumuuna aamma

qinigassanngortittoq ataaseq amerlanerussuteqavissumik taaneqanngippat taaseqqittoqassaaq qinigassanngortittut marluk amerlanerpaanik taaneqarsimasut akornanni. Taasinerlu taanna naligiiffiulluni inerpeqarpat makitsisoqartassaaq.

Imm. 2-mut

Aalajangersakkami aalajangerneqarpoq kommunimi sulilerumallutik qinnuteqartut arlallit akornanni ataatsimiititaliani toqqaanissami imaluunniit kommunalbestyrelsimi taasinissami immikkut periaaseqarnissaaq.

Atorfinititsinissamut atatillugu oqaluuserinninnermi tunngavissatut qinnuteqartut pillugit paasissutissat tamarmik saqqummiunneqassapput, toqqaanissamilu taakku arlaat kinaluunniit siunnersuutigineqarsinnaavoq. Taamaattumik toqqaanissaaq, tamanna isumaqatigiinngissutigineqanngippat, qinnuteqartut ilaannaanut, soorlu ataatsimiititaliamit imaluunniit allaffimmit inassutigineqarsimasunut, tunngatinneqarsinnaanngilaq.

§ 38-mut

Aalajangersagaq § 37-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkakkut pissutsit sillimaffigineqarput, ataatsimiititaliami ilaasortaq qinigaaffiup iluani ilaasortaajunnaarpat taamaalillunilu ilaasortamik allamik taarserneqartussangorluni.

Aalajangersakkami aalajangerneqarpoq ilaasortaq suleqatigiinneersoq tunuarpat suleqatigiit taakku ilaasortamik nutaamik qinersisussat.

Imm. 2-mut

Kommunalbestyrelsip ataatsimiittarnerinit ataatsimiititaliat amerlanerusunik ataatsimiittarmata, ataatsimiititalianili ilaasortat tamatigorluinnangajak ikittuinnaat peqataasarnerisa kingunerannik tamakkiisumik peqataasoqartarnissaa pisariaqartinneqartarmat, tak. § 26. imm. 2-mut nassuiaatit, sinniisussap killilersorneqanngitsumik ataatsimiititaliamut ataatsimiigiaqquneqarsinnaanera ilanngunneqarpoq.

Taamaakkaluartorli kommunalbestyrelsimut ilaasortap taamatut sulinini ingerlatiinnartillugu piffissap ilaani ataatsimiititaliamit imminut tunuartikkallarsinnaanngilaq, aamma tak. § 15, imm. 2-mut nassuiaatit, tamatumani aningaasaqarnermut ataatsimiititaliamut aammalu ataatsimiititalianut ataavartunut qinigaanerit pisussaaffiummata.

Qinigaaffimmi suleqatigiit aalajangigassaraat sinniisussamik ataatsimiigiaqqusinermut piumasagaatit naammassineqarsimanersut.

Qinigaaffimmili suleqatigiit pisussaangillat ataatsimiititaliami inissaq inuttaqanngikkallartooq ilaasortap najuutinngitsup sinniisussaanut tunniutissallugu.

Aalajangersagaq taamaallaat atorneqassaaq ilaasortanut ataatsimiititaliami ilaasortassatut qinigaasimasunut, atorneqassananili pinngitsoorani ilaasortaasussanut, soorlu borgmesteri pinngitsoorani aningaasaqarnermut ataatsimiititaliamut ilaasortaasussaasoq. Taamaattumik borgmesterip najuussinnaanngikkallarnerani aningaasaqarnermut ataatsimiititaliamut ilaasortamik nutaamik qinersisoqarsinnaanngilaq, ulluinnarnili allaffiup aqunneqarnera, tak. siunnersuutip § 22, imm. 2, borgmesterip tullianit ingerlanneqalersimappat borgmesterip tullia aningaasaqarnermut ataatsimiititaliamut aamma siulittaasunngusaaq.

Borgmesterip tullia aningaasaqarnermut ataatsimiititaliamut ilaasortaareerpat borgmesterillu suliaanik suliaqalerpat ataatsimiititaliami inissaq ataaseq inuttaarutissaaq.

§ 39-mut

Aalajangersagaq § 38-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami periuseq maannamut atuuttoq inatsimmi aalajangersarneqarpoq ataatsimiititaliani oqaluuserineqarnerini suliassamut aalajangersimasumut attuumassuteqarneq pissutigalugu aalajangeeqataasinnaannginnermut tunngatillugu suliassap suliarineqartarneranut tunngasoq. Aalajangersagaq ataatsimiititalianut tamanut atuuppoq.

Malittarisassat kommunalbestyrelsinut atuuttut, tak. § 14-imut nassuiaatit, assigalugit suliassamut attuumassuteqarneq pissutigalugu aalajangeeqataasinnaajunnaarsitaanissaq ilumut pissutissaqarnerasoq pillugu aalajangiiniarnerit pisortat ingerlatsineranni suliat suliarineqartarnerat pillugu Inatsisartut inatsisaanni malittarisassat naapertorlugit pisassapput.

Imm. 2-mut

Kommunalbestyrelsimi ilaasortat borgmesterimut nalunaartussaataitanerat pillugu § 14, imm. 2-anni aalajangersakkanut suliassamut attuumassuteqarneq pissutigalugu aalajangeeqataasinnaajunnaarsitsinissaq nalornisoorfiutillugu aalajangersakkamut una assinguvoq.

Imm. 3-mut

Aalajangersakkakut qularnaarniarneqarpoq ilaasortap ataatsip suliassamut attuumassuteqarneq pissutigalugu aalajangeeqataasinnaajunnaarsinneqarneratigut kommunalbestyrelsimi pissaanerup oqimaaqatigiinnerata nikisinneqartanninnissaa.

Kommunalbestyrelsimi ikinnerussuteqartut amerlanertigut ataatsimiititaliani ataasiinnarmik ilaasortaataqartarnerat eqqarsaatigalugu aalajangersarneqarpoq § 14, imm. 3-mi aamma 4 ataatsimiititaliani sulinermi atuutissaaq ikinnerussuteqartunut illersuutit.

Imm. 4-mut

Imm. 3-mut nassuiaatit innersuussutigineqarput.

Kommunalbestyrelsip ataatsimiititaliai nalinginnaasumik ilaasortakitsuusarmata malittarisassat § 14, imm. 4-miittut, ilaasortap ataatsip suliassamut attuumassuteqarneq pissutigalugu aalajangeeqataasinnaajunnaarsitaanini pissutigalugu najuutinngikkaluartup aammalu sinniisussap ataatsimiititaliap suliassaminik ingerlatsinissaanut aggersarneqarsimannngikkaluartup, suliap naammassineqarnissaanik ilaasortat 2/3-iisa piumasaaqateqarsinnaanerannut tunngasut naleqquttuusorineqarpoq nuunneqarnissaat.

§ 40-mut

Aalajangersagaq § 39-mik atuuttumik aaqqissuussaannikkut allannguuteqartitsilluni ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkakut aalajangerneqarpoq ataatsimiititaliani ilaasortat pisortat ingerlatsivianni ataatsimiititaliap akisussaaffigisaani sullissinertik sapinngisamik akissarsiaqaatigissanngikkaat. Taamaattorli periarfissiisoqarpoq ataatsimiititaliami ilaasortaq suliassamik tiguisinnaasoq, suliassaq tamanut ammasumik suliarinnittussarsiorneqareersimappat. Aammattaaq ilaasortaq qaqutigunnaq pisartunik akilerneqarluni sulisarsinnaavoq pisortatigut ingerlatat ilaani ataatsimiititaliamit akisussaaffigineqartumi pissutsinik immikkut ittunik pisoqartillugu. Tamanna atuutinneqarsinnaavoq ilaasortaq kisimiilluni suliassap naammassineqarnissaanut pisinnaasat pisariaqartut ilaasortap kisimi naammassisinnaappagit.

Imm. 2-mut

Aalajangersagaq ilanngunneqarpoq periaatsit tulluanngitsutut assersuutissat arlallit tunngavigalugit, tassa inuit appasinnerusumi atorfeqartut imaluunniit nunaqarfinni atorfeqartut nalinginnaasumik kommunini qinikkatut pisortanut allaffimmiluunniit pisortanut toqqaannartumik qanittumilluunniit attaveqanngitsut kommunit ataatsimiititaliaani ataavartuni ilaasortaasinnaasarsimannngimmata. Taamaattumik ilanngussisoqarpoq qanoq ungasitsigisumiinneq killiliiffigineqartalissasoq, pingaartumik siunertaralugu inuit sulianut attuumassuteqarnertik pissutigalugu ataatsimiititaliani

ilaasortaasinnaajunnaarsinneqarsinnaasut taamalu suliarinneqataasinnaangitsut, imaluunniit ataatsimiititaliami ilaasortaanerisa nassatarissappassuk ilaasortap pineqartup nammineq suliffigisaminut nakkutilliisooqataalernissaa.

Pingaartumik eqqarsarnartoqarpoq sulisup allaffissornikkut suliassat pingaaruteqarnerusut suliarisarsimassappagit. Aalajangiisuusutut sianiginiagassat sulisup ingerlatsiveqarfimmut ataatsimiititaliamut ataavartumut akisussaasoq marloqiusamik suliaqalersinnaaneramik, taamaalillunilu ataatsimiititaliamut ilaasortatut sulianut nammineq inassutigisaminut isummertarnissaanik ajornarsisitsipput.

Nr. 1-imi aamma 2-mi pineqarput ataatsimiititaliat ataavartut suliassaqrifiini pisortat aamma sulisut atorfeqarnermi periaatsit malillugit, suliassat allattorsimaffiat imaluunniit oqartussaaffiit agguataarneqarnerat malillugit suliallit immikkoortortaqriffinni pisortanut paarlattaasartussat. Immikkoortortaqriffinni pisortatut assersuutigineqarsinnaapput isumaginninnermi pisortat, atuarfiit pisortaat aamma kommuneingeniørit.

Nr. 3-mi inuit pineqartut naliliiffigineqassapput taakku suliaasa imarisaat tunngavigalugit. Kommunalbestyrelsit ataasiakkaat namminneq ingerlatsinertik qanoq aaqqissuutissallugu annertuunik periarfissaqartitaapput, tamakkununga ilanngullugit sulisuni sunik suliassaqaassanersut atorfirminnilu qanoq taaguuteqaassanersut, killiliiniarnermili atorfiit qanoq taaguuteqarneri kisimik pingaartinneqartussaangillat. Pingaartinneqartariaqarput aaqqissugaanermi oqartussaaffiillu agguataarneqarneranni atorfiit imarisaasa nalunaarsorneqarneri il.il. tunngavigalugit pineqartut qanoq pisinnaatitaaffeqartigineri aalajangiutissallugit. Pingaaruteqarluinnarpoq atorfilik nalinginnaasumik pisortatut akisussaaffeqarnerisooq namminerlu sulisunik siulersugaqarnerisooq. Atorfiup aningaasarsiaqarnerup tungaatigut inissisimanagera aamma tikkuusooqataasinnaavoq.

Sulisunut nr. 3-mi aalajangersakkat malillugit ataatsimiititaliani ataavartuni ilaasortaasinnaangitsunut assersuutitut taaneqarsinnaapput allattoqarfinni pisortat, immikkoortortaqriffinni pisortat, allaffinni pisortat allallu immikkut sulisoqarnermut akisussaaffillit. Aamma sullissivinni pisortat allallu sullissivinni allaffissornikkut pisortatut suliaqartitat ataatsimiititaliani ataavartuni sullissivimmut akisussaasuni ilaasortaasinnaangillat.

Imm. 3-mut

Nr. 1-mi pineqarput sulisut tamarmik aningaasaqarnermut ataatsimiititaliap suliassaataanik, aningaasaqarnermut immikkoortoqarfiup, akissarsianut sulisoqarnermullu immikkoortoqarfiup suliassaataanik suliallit aningaasaqarnermut ataatsimiititaliamut ilaasortaasinnaatitaasussaanginneri.

Nr. 2-mi pineqarput pingaartumik sulisut ingerlatsiviup ilaani, nr. 1-imut ilaanngikkaluartuni, aningaasaqarnermut ataatsimiititaliamit akisussaaffigineqartuniittut, assersuutigalugu inuit

pilersaarusiornermik suliallit aamma immikkoortoqarfinni aningaasaqarnermut ataatsimiititaliamit toqqaannartumik akisussaaffigineqanngikkaluarlutik tassunga attuumassuteqartuni, assersuutigalugu akileraaruserivimmi inunnillu allattuiffinni sulisut.

Nr. 3-mi immikkoortoqarfinni pisortat pineqartut, imm. 2-mi nr. 1-imi pineqartut assignagit immikkoortoqarfinni pisortamut paarlattaaginnartut aningaasaqarnermut ataatsimiititaliamut ilaasortaasinnaanerata akornutissaqartinneqanngilaq.

Imm. 4-mut

Aalajangersagaq inatsimmi atuuttumi § 39, imm. 4-mik ingerlatitseqqinneruvoq, tamatumuuna inatsisitigut aalajangiunneqarluni apparisaq pissutigalugu aalajangeeqataasinnaajunnaarneq atortuusassasoq tamatuma pisortat ingerlatsineranni suliat suliarineqartarnerat pillugu inatsimmi aalajangersarneqarnerata kinguneranik. Aappariinnerni katissimanertut assersuunneqarsinnaasuni paasineqassaaq aappariinneq sivisunerusumik ingerlanneqarsimasoq imaluunniit aappariit najugaqatigiippata.

§ 41-imut

Aalajangersagaq § 51-imik atuuttumik ingerlatitseqqinneruvoq, allanngortitsinissarluk eqqarsaatigineqanngilaq.

Imm. 1-imut

Nunaqarfinni aqutsisunut ataatsimoorussanut aamma nunaqarfinnut aqutsisunut qinersisarnermi kommuninut qinersisarnermi inatsimmi maleruagassanut aalajangersagaq ilassutaavoq.

Imm. 2-mut

Aalajangersagaq imm. 2-mik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Tulluartautinneqanngilaq nunaqarfiit aqutsisuisa siulittaasuannik qinersinermi sukumiisunik maleruagassiukkamik periaaseqartoqarnissaa, tamatumani qinersinermi nunaqarfiit aqutsisuisa ilaasortaasa ikinneri pissutigalugit borgmesterimut qinersinermiit persuarsiorpalunnginnerusumik ingerlanneqarsinnaassammat.

Nunaqarfiit aqutsisuinut kikkut qinerneqarsinnaaneramik aalajangersakkat kommuninut qinersinermi inatsisikkut aalajangersarneqarput.

Imm. 3-mut

Aalajangersagaq oqaasertaasigut allanngortillugu imm. 3-mik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq. Taamaattumik nunaqarfinni aqutsisut

kommunalbestyrelsimit pisinnaatitsinermut atatillugu sulipput. Tamatuma kingunerisaanik kommunalbestyrelsip allaffissornikkut nukissat nunaqarfiit aqutsisuinut qulakkeertussaavai, kommunalbestyrelsip nunaqarfinni aqutsisunik nakkutilliisussaataitanera pissutigalugu.

Kommunalbestyrelsi nunaqarfinni aqutsisunut aalajangiisinnaanermik pisinnaatitsissummik tunniussaartoq allaffissornikkut suliassanik naammassinnissinnaanermik qulakkeerinnissimangitsoq inatsimmi aalajangersakkat naapertorlugit akisussaatinneqarsinnaavoq.

§ 42-mut

Aalajangersagaq § 52-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersagaq suleriaasissamut minnerpaanik piumasaqaatinik arlalinnik saneqqunneqarsinnaanngitsunik atuutilersitaqarpoq.

Kommunalbestyrelsimi sulinertut nunaqarfinni aqutsisut atuunnerat pillugu periaatsinik aalajangersakkanik sukumiisunik atuutitsisoqarnissaa tulluurtuusorinanngilaq. Aalajangersagaq aamma periarfissiivoq nunaqarfimmit nunaqarfimmut pissutsit assigiinngiaartorujussuusut kommunalbestyrelsit pitsaanerusumik sillimaffigisinnaalernissaannut. Nunaqarfinni aqutsisut suleriaasissaasa aalajangersarneqarnerat kommunalbestyrelsimi suliarineqassaaq, takussutissaassallunilu nunaqarfiit annertunerusumik aalajangiisinnaanermik pisinnaatinneqarnerinik, taamaattumillu allaffissornikkut suleriaatsinik erseqqissunik nunaqarfinni aqutsisut sulinerannut aalajangersagaqarnissaaq pingaaruteqarpoq, aalajangersakkanut kommunalbestyrelsip nammineerluni periaasiinut ataqatigiissaarneqarsimasunik.

Kommunalbestyrelsip nunaqarfinni aqutsisut suleriaasissaannik aalajangersakkanik aalajangersaasinnaanera nunaqarfinni aqutsisunik tusarniaasoqareerneratigut pisassasoq pisariaqarpoq.

Imm. 2-mut

Aalajangersagaq nalinginnaasumik suliamut attuumassuteqarneq pissutigalugu aalajangeeqataasinnaanginnermut aalajangersagaavoq, taassumalu nunaqarfinni aqutsisut annertunerusumik pisinnaatinneqarnissaannik ilimasuuteqarnerup kingunerisaanik ilanngunneqarnissaa siunnersuutigineqarpoq.

Imm. 3-mut

Aalajangersagaq imaqarpoq kommunalbestyrelsimi ataatsimiititaliani ikinnerussuteqartut pisinnaatitaaffii pillugit nunaqarfinni aqutsisuni ilaasortanut aamma atuutinneqarnissaanik qulakkeerinnimmat, tak. § 30.

Aalajangersagaq taamaallaat atuuppoq suliassani nunaqarfinni aqutsisunut aalajangiisinnaanermik oqartussaaffilerneqarsimasuni. Suliassani nunaqarfinni aqutsisut siunnersuummi § 43 nassataanik, tak. ataanniittoq, kommunalbestyrelsimut innersuussummik imaluunniit tassunga oqaaseqaateqartoqartillugu, nunaqarfinni aqutsisut ikinnerussuteqartut ikinnerussuteqarluni oqaaseqaammik imaqarniliamut ilanngussisinnaatitaaneq atorsinnaavaat.

§ 43-mut

Aalajangersagaq § 53-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Aalajangersakkakut aalajangersarneqarpoq nunaqarfinni aqutsisut nunaqarfimmi pissutsinut attuumassuteqartuni kommunalbestyrelsimut innersuusutunik nassitsisinnaatitaaffeqarnerinik. Aammattaaq aalajangersakkap kommunalbestyrelsi pisussaaffilerpaa kommunalbestyrelsimi suliassani nunaqarfinni pissutsinut attuumassuteqartuni suliaqarnerni nunaqarfinni aqutsisut tusarniaavigineqartarnissaannik.

§ 44-mut

Aalajangersakkakut nalorninaallisinneqarpoq kommunalbestyrelsi nunaqarfinni aqutsisunut aningaasanik atugassanngortitsisassasoq. Tamakku saniatigut aalajangersagaq § 54-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkakut aalajangerneqarpoq nunaqarfinni aqutsisut aatsaat aningaasartuuteqarsinnaasut kommunalbestyrelsip aningaasaliissuteqareerneratigut. Aalajangersagaq kommunalbestyrelsip aningaasaliissuteqarsinnaatitaaneranut atatillugu isigineqassaaq.

Taamaalilluni kommunalbestyrelsit nunaqarfinni aqutsisunut aningaasaliisinnaanngillat pisinnaatitsissutip imm. 2 naapertorlugu tunniunneqarsimasut avataasigut.

Imm. 2-mut

Aalajangersakkami siullertut nalunaarpaa, kommunip missingersuusiatigut nunaqarfinni aqutsisut aningaasanik atorsinnaasaannik tunineqassasut. Aalajangersakkap aappaattut nalunaarpaa aningaasaliissutaasunik nunaqarfinni aqutsisut atuisinnaatitaanerat.

Aalajangersakkamili aalajangerneqanngilaq nunaqarfinni aqutsisunut allaffissornikkut pisinnaassuseq qanoq annertutigisoq pisinnaatitsissutigineqarsinnaanersoq, tamanna aalajangerneqassammat § 41, imm. 3 aallaavigalugu. Illuatigulli atuisinnaatitaaneq pisariaqartitsivoq, soorlu imm. 1 naapertorlugu ingerlaannartumik aalajangiisinnaanermik pisinnaatitsinerup kingunerissagaa atuisinnaatitsineq pissasoq aningaasaliissutaasutut killigititaasut iluanni.

Taamaalilluni massakutulli nunaqarfiit aqutsisunut aalajangiisinnaatitaanermik tunniussisoqarsinnaavoq aningaasaqarnikkut akisussaaffeqarnermik malitseqanngikkaluartumik. Nunaqarfinni aqutsisut aningaasaliissutit atorneqarsinnaatitaasut nungullugit atorsimalerpatigit, aalajangiisinnaassuseq aningaasaliissutaasunut taakkununga attuumassuteqartoq taamaalilluni aamma atortussaajunnaassaaq.

Kommunalbestyrelsili, soorlu nalunaarneqartutut iliuuseqarsinnaassusermik annertunerusumik imm. 2 naapertorlugu aningaasatigit pisinnaatitsineq qaangerlugu tunniussinnaassavaa imaluunniit aningaasanik atorneqarsinnaasunik amerlanerusunik ilassutitut aningaasaliissuteqarsinnaalluni. Tamannali qaqutigunnaq pisinnaasariaqarpoq, siunertammat aningaasanik atorneqarsinnaasunik illikartitsinerup nunaqarfinnut allaffissornikkut oqilisaassutaanissaa sinaakkuteqarluni aqutsinerup atulerneratigit.

Sinaakkuteqarluni aqutseriaatsimut akerliussaaq aqutsinikkut ingerlanerliorneq pissutigalugu aalajangiisinnaassusermik tunniussinikkut ingerlanerliorneq akissarsissutaassappat. Aningaasat atorneqarsinnaatitaasut ingerlatsinerliorneq pissutigalugu nungunneqarpata tamatigit kingunerisariaqarpaa ilassutissanik aningaasaliissuteqaqqittoqannginnera aammalu ilassutaasumik aalajangiisinnaassusermik tunniussisoqaqqinnginnera.

Suliassaqarfimmut inatsisit naapertorlugit sinaakutissatut aningaasaliissutinik atuisoqartassaaq. Kultureqarnermut innuttaasunullu qaammarsaanermut, najukkani inuusutissarsiutitigit suliniutinut kiisalu isumaginninnermut attuumassuteqartunut aningaasanik atugassiinermi tamanna pingaaruteqarpoq.

Kommunalbestyrelsip nunaqarfinnut aqutsisunut nunaqarfinni aqutsisunut aningaasat atugassatut immikkoortitsineratigit kommunalbestyrelsit susassaqarfinnut inatsit naapertorlugu pisussaaffii atuutiinnassapput.

Imm. 3-mut

Aalajangersakkap siunertaraa nunaqarfinni aqutsisut suliaannik kommunalbestyrelsip ilisimasaqarnissaa qulakkiissallugu.

Nunaqarfinni aqutsisut suleriaasissaanni ilassutaasunik ilanngussisoqarsinnaassaaq uppersaatiit misissorneqartarneranni iliuusissanik annertunerusunik, aamma imm. 2 naapertorlugu taaneqartuni nunaqarfik aningaasatigut piginnaatinneqarsimanngikkaluartoq.

§ 45-imut

Aalajangersagaq § 55-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap naqissuserpaa nunaqarfimmi aqutsisup siulittaasuat tassaasoq nunaqarfimmi aqutsisoq ingerlatsinerannut akisussaasuusoq. Ilaatigut inatsisikkut tassuuna innersuus-sutigineqarput Inatsisartut inatsisaat manna aamma suliat suliarineqartarnerat pillugu Inatsisartut inatsisaat aamma pisortat ingerlatsineranni tamanut saqqummiussisarneq pillugu inatsisartut inatsisaat.

Aalajangersakkap aamma kingunerissavaa nunaqarfinni aqutsisut siulittaasuata kommunal-bestyrelsimut attaveqaatitut atuuttuaannartussaanera.

Imm. 2-mut

Aalajangersagaq erseqqissarniarpaa kommunalbestyrelsi nunaqarfinni aqutsisunik nakkutilliisuususaasoq.

Nakkutilliisuutitatut oqartussat nunaqarfinni aqutsisunik toqqaannartumik nakkutilliinissaminnik periarfissaqassanngillat kisiannili nakkutilliineq kommunalbestyrelsi aqqutigalugu ingerlattussaallugu. Naalackersuisut nunaqarfinni aqutsisut suliaannik paasisaqarusullutik kissaateqarpata tamanna kommunalbestyrelsi aqqutigalugu pisassaaq. Kommunalbestyrelsi nunaqarfinni aqutsisunut pisinnaatitsisuuvoq, taamaattumillu taamaaliornikkut suliat, aningaasaliissutit aamma pisinnaatitsissutit naapertorlugit ingerlanneqarnerannik akisussaaffimmik tigusiumanngissinnaanngillat.

§ 46-imut

Aalajangersagaq § 56-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami ersarissarneqarpoq nunaqarfinni aqutsisut aningaasarsiaqartinneqarnerat kommunalbestyrelsip akisussaaffigigaa Naalackersuisut sinaakktissatut aalajangersagaat tunngavigalugit.

Imm. 2-mut

Ilassutitut akissarsiat kommunalbestyrelsimit akuerineqartut ataasiakkaat nalilersuiffigereernerisigut tunniunneqarsinnaapput. Naliliinerni siulittaasup akisussaaffia aamma suliaqarnikkut nammatai immikkut isiginiarneqartassapput.

Imm. 3-mut

Naartunermi, erninermi meeravissartaarnermilu inatsit tamatumunnga tunngasoq naapertorlugu nunaqarfinni aqutsisut sulinngiffeqarnissamut pisinnaatitaapput akissarsiaminnik annaasaqaratik.

§ 47-imut

Aalajangersagaq § 57-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Naalackersuisut kommunit ingerlatsinerinik nakkutilliisuussapput. Naalackersuisut kommuninut aqutsinermut ileqqoreqqusat tigusartussaavaat, tak § 1, imm. 4, kommunalbestyrelsip ataatsimiinnerinik piffissamik sumiiffimmillu ilisimatinneqartartussallutik, tak. § 8, imm. 1 aamma 3, aamma kommunalbestyrelsip matoqqasumik sulianik suliaqarnerini sinniisoqarsinnaatitaallutik, tak. § 9, imm. 4. Kiisalu Naalackersuisut kommunalbestyrelsip ataatsiminnerinit imaqarnilianik tigusaqartartussaapput, tak. § 16, imm. 4.

Imm. 2-mut

Aalajangersakkami aalajangerneqarpoq immikkut naammagittaalliornissamut periarfissaqartoqartillugu imaluunniit suliani aalajangersimasuni nakkutilliinermik oqartussa qarfeqartoqartillugu Naalackersuisut pineqartuni nakkutilliisuusinnaassanngitsut. Assersuutigalugu taaneqarsinnaavoq inunnik isumaginninnermi inatsit naapertorlugu Isumaginninnermi sulianut Naammagittaalliuuteqartarfimmi aalajangiiffiusimasumi naammagittaalliuutigineqarsimasut taamaalilluni nakkutilliisuutitatu oqartussaasunut anngunneqarsinnaasarnatik.

Imm. 3-mut

Aalajangersakkami aalajangerneqarpoq Naalackersuisut nakkutilliisussaataanerata atorfinitsitsinermi malittarisassat pineqartillugit atuutinnginnera erseqqissarniarlugu. Apeqqutit atorfinitsitsinermi malittarisassanut tunngasut pineqartillugit tamakku atorfinitsitsisarnernik isumaginnittunut innersuunneqartassapput.

§ 48-mut

Aalajangersagaq § 58-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq Naalackersuisut nakkutilliinerannut atatillugu atortut kommunalbestyrelsimit piumasarineqartut pinngitsoorani tunniuneqartartussaanut erseqqissarniarlugu. Kommunalbestyrelsi aamma pisussaavoq nakkutilliisuutitatus oqartussanut uppersaait piumasarineqartut tamaasa tunniuttassallugit, pineqartut qanorluunniit iluseqaraluarpata.

Imm. 2-mut

Kommunit aningaasaqarnikkut ingerlatsinerini immikkut pisoqartillugu Naalackersuisut misissuinissaminnut periarfissaqaqqullugit aalajangersagaq, kommunalbestyrelse kukkunersuinermi oqaaseqaatinik tunniussisussanngortinneratigut, periarfissiivoq.

Imm. 3-mut

Piffissamik aalajangiineq pisut ataasiakkaat naapertorlugit ingerlanneqartassaaq aammalu suliap qanoq paasiuminartiginera nunamilu sumi inissisimanera apeqqutaatillugit.

Imm. 4-mut

Aalajangersakkami qulakkeerneqassaaq kommunalbestyrelsip suliainnik paasissutissiineranut atatillugu sulinerup iluani Naalackersuisunut suliainnik tunngatillugu paasissutissat nassiinneqarsinnaasut suliainnik tunngasut innarlinngikkaluarlugit taamaasillutillu piumasaqaatigineqarpat allagaatinik takunnissinnaanermik qinnuteqarnermi tunniinneqarsinnaanngorlutik.

Imm. 5-mut

Aalajangersakkap qulakkiissavaa nakkutilliinermi suliainnik imaluunniit sularineqarusuttumut tunngasuni ilisimasaqassuttip aammalu suliainnik paasissutissat eqqortut paasissutissiissutigineqarsinnaaqqullugit. Nakkutilliisutut oqartussat assersuutigalugu akileraartarnermi paasissutissanik oqartussanit attuumassuteqartunit piumasaqartarsinnaassapput.

§ 49-mut

Aalajangersagaq § 59-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Aalajangersakkami aalajangerneqarpoq Naalackersuisut nakkutilliisussaananermik suliainnik, taamaammat taamaallaat suliap suussusia naapertorlugit Nakkutilliisoqarfimmut suliassanngortittariaqarnermoq Naalackersuisut aalajangersinnaavaat.

§ 50-imut

Aalajangersagaq § 60-imik atuuttumik ingerlatitseqqiineruvoq. KANUKOKA-p aaqqissuussaaniikkut allanngornerata kingunerisaanik aalajangersakkap imatut allanngortinneqarnissaa siunnersuutigineqarpoq, Nakkutilliisoqarfimmut ilaasortassanik kommunit toqqaasarnerat KANUKOKA-meersuujuunnaartillugu kommuninut isumagisassanngortinneqassasoq. Taamatuttaaq siunnersuutigineqarpoq erseqqissarneqassasoq inissanik inueruttoqartillugu ilaasortassanik sinniisussanillu nutaanik toqqaasoqartalissasoq. Aamma allannguisoqarnissaa siunertarineqanngilaq.

Imm. 1-imut

Aalajangersakkakkut Nakkutilliisoqarfiup katitigaanera aalajangerneqarpoq, tassungalu siunertaasoq tassa isumannaassallugu, suliaminni ingerlaavartuni Inatsisartunit Naalakkersuisunillu annertunerpaamik kiffaanngissuseqarmik angusaqarnissaat. Siunnersuutikkut erseqqissarneqarpoq kommunalbestyrelsinut qinersisoqareneri tamaasa kommunit Nakkutilliisoqarfimmut ilaasortassanik marlunnik toqqaasassasut. Kommunit aalajangissavaat Nakkutilliisoqarfimmut ilaasortassanik toqqaasarnerup ataqatigiissaarneqarnissaa.

Imm. 2-mut

Nalinginnaasumik nalunaarneqarpoq ilaasortap peqataasinnaannginnerani sinniisussap aggersarsinnaaneraniq periarfissaqarnera aammattaaq aalajangeeqataasinnaannginnermi sinniisussap aggersarneqarsinnaanera. Sinniisussat toqqarneqarnerini imm. 1-imi pineqartuni oqaasissaqartitaasut aamma ilaasortanik nalinginnaasunik toqqaasuusut toqqaasuussassapput.

Imm. 3-mut

Aalajangersagaq nutaajuvoq. Siunnersuutigineqarpoq erseqqissarneqassasoq Nakkutilliisoqarfimmi inissanik inueruttoqartillugu ilaasortassanik sinniisussanillu nutaanik toqqaasoqartassasoq. Ilaasortaqaq ataaseq tunuarpat, sinniisissaata inissaq tigussavaa, taamaalillunilu sinniisissamik nutaamik toqqaasoqassaaq.

§ 51-imut

Aalajangersagaq § 61-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkakkut aalajangersarneqarpoq siulittaasup imaluunniit ilaasortat pingasut pisariaqartippassuk Nakkutilliisoqarfiup ataatsimiittassasoq.

Imm. 2-mut

Siulittaasoq ilaasortanik ataatsimiigiaqqusinnissamut oqartussaassuseqarpoq, aammalu ataatsimiinnissamut piffissamik sumiinnissanillu aalajangiisinnaassuseqarluni.

Imm. 3-mut

Aalajangersakkap aalajangerpaa Nakkutilliisoqarfiup ilaasortaannut suliasat sorliit ataatsimiinnermi suliarineqassanersut pillugit paasissutissanik tunniussisinissamik siulittaasoq pisussaaffeqartoq.

Imm. 4-mut

Siulittaasup Nakkutilliisoqarfiup ataatsimiinnerisa nalaanni aalajangikkat imaqarniliamut allanneqarnissaat, ataatsimeereernermilu ilaasortanik ataatsimeeqataasunit imaqarniliap atsiorneqarnissaat isumagissallugu pisussaaffigaattaaq.

Kinaluunniit Nakkutilliisoqarfimmi ilaasortaqaq allatut isummaminik imaqarniliamut allatsitaqassalluni pisinnaatitaaffeqarpoq taamatuttaaq kommunalbestyrelsinut ilaasortat § 16, imm. 1-mi pisinnaatitaaffianni.

§ 52-imut

Aalajangersagaq § 62-imik atuuttumik ingerlatitseqqinneruvoq, allannqortitsisoqarnissaanillu eqqarsaateqartoqanngilaq.

Imm. 1-imut

Aalajangersakkami aalajangerneqarpoq Nakkutilliisoqarfik aalajangiisinnaassuseqartoq, Nakkutilliisoqarfiup siulittaasua aammalu minnerpaamik ilaasortat marluk najuuppata.

Imm. 2-mut

Aalajangersakkami aalajangerneqarpoq aalajangernerit amerlanerussuteqarnikkut pisassasut. Aamma aalajangersakkakkut aalajangerneqarpoq taasinerni naligiittoqartillugu siulittaasup taasinera aalajangiisuusassasoq.

Aalajangersakkakkuttaaq aalajangerneqarpoq Nakkutilliisoqarfiup ilaasortaata kialuunniit aalajangerniarnerup ingerlanneqarnera unitsissinnaagaa suliaq Naalakkersuisunut aalajangigassanngoqqullugu piumasaqarnermigut.

Imm. 3-mut

Aalajangersakkakkut erseqqissarneqarpoq kommunimi kommunalbestyrelsimut ilaasortaaffigisami pissutsit Nakkutilliisoqarfimmi oqaluuserineqartillugit tamanna suliasamat Nakkutilliisoqarfimmi

suliarineqartussamut attuumassuteqarneq pissutigalugu aalajangeeqataasinnaajunnaarnermik kinguneqartassasoq.

§ 53-imut

Aalajangersagaq § 63-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap Nakkutilliisoqarfiup siulittaasua suliarineqartuni apeqquserneqarsinnaanngitsuni suliarineqartunilu kinguartinneqarsinnaanngitsuni aalajangiisinnaanngorlugu pisinnaatippa.

Aammattaaq aalajangersarneqarpoq Nakkutilliisoqarfiup siulittaasuata Nakkutilliisoqarfiup aalajangigaasa piviusunngortinneqartarnissaat akisussaaffigigaa.

Imm. 2-mut

Nakkutilliisoqarfiup siulittaasuata aalajangigai Nakkutilliisoqarfiup ataatsimiinnerani tulliuuttumi saqqummiunneqartassapput.

Imm. 3-mut

Aalajangersakkami ersersinneqarpoq Nakkutilliisoqarfiup allattoqarfia Naalakkersuisunit toqqarneqassasoq, taamaattorli Naalakkersuisut allaffissorneranni ilaatinneqarnissaat pisariaqanngitsoq.

Allattoqarfiup sulinermini Naalakkersuisunut pituttorsimannginnissaa naatsorsuutigineqarpoq, taamaalillunilu Nakkutilliisoqarfiup siulittaasuanut taamaallaat attuumassuteqarluni aammalu ingerlatsinermi aalajangersakkat nalinginnaasut tunngavigalugit suliassani ataasiakkaani suliassallu aalajangersimasut ilaanni allattoqarfik sinnerluni aalajangiisinnaanngorlugu kissaateqartarsinnaalluni. Kisiannili siulittaasup allattoqarfimmut aalajangiisussaataitanermik suliakkiinerani allattoqarfimmi sulisup inatsisissatut siunnersuummi § 50, imm. 1, nr. 1-imi siulittaasup piginnaaneqarnissaanut piumasaqaataasup assinganik inatsisilerituutut sulinissamut soraarummeersimanissaa piumasarineqarpoq.

§ 54-imut

Aalajangersagaq § 64-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Aalajangersakkami aalajangerneqarpoq Nakkutilliisoqarfiup sulinerani aningaasartuutit Nunatta Karsianit akilerneqartassasut.

§ 55-imut,

Aalajangersagaq § 65-imik atuuttumik aaqqissuussaaniikkut allannguuteqartitsiviulluni ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Aalajangersakkap naqissuserpaa, kommunalbestyrelsip, aningaasaqarnermi ataatsimiititaliap imaluunniit ataatsimiititaliap ataavartup aalajangiineri inatsisinik unioqputitsiviusut Nakkutilliisoqarfiup atorunnaarsissinnaagai.

Imm. 2-mut

Aalajangersakkap Nakkutilliisoqarfik periarfissippaa kommunimi aalajangikkamik atorunnaarsitsigallarsinnaanngorlugu, tassa imm. 1 naapertorlugu atorunnaarsinneqavissaneramik aalajangerneqarnissap tungaanut. Aalajangersagaq atulersinneqarpoq Nakkutilliisoqarfik aalajangiinissaq pillugu paasiniaanissamut pisariaqartitaanik piffissalerumallugu, taamaaliornermilu aalajangernerup piffissap ingerlanerani piviusunnngortinneqarsimanerata kinguneramik Nakkutilliisoqarfiup atorunnaarsitsisariaqalernissaa pinngitsoorumallugu.

Malittarisassakkut peqqussutigineqarportaaq aalajangigaq piviusunnngortinneqarsimasooq taamaallaat atorunnaarsinneqarsinnaasooq atorunnaarsikkallarneqarsinnaasorluunniit piumasarisat erseqqinnerusumik tunngavissiissutit malillugit, tamannalu pissuteqarpoq aalajangigaq piviusunnngortitaasimasooq tunngaviusumik innuttaasunit tatigineqarsinnaasariaqarmat.

§ 56-imut

Aalajangersagaq § 66-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Imm. 1-imut

Akissarsiat aalajangersimasut annertussusiisa aalajangersarneqarneranni sapinngisamik qulakkeerneqassaaq inuussutissarsiummik namminersorluni ingerlataqartunut aamma namminersorlutik inuussutissarsiortuni sulisorisanut aamma pisortani oqartussani sulisorisanut kommunimi naalakkersuinikkut ingerlatseqataarusunnerup kajungernartuunissaa tunngavigineqassasooq, soorluttaaq soorunami suliassat annertussusaat eqqarsaatigineqarumaartut. Aningaasat annertussusissaat nalunaarummi aalajangersarneqassapput.

Imm. 2-mut

Aalajangersakkami kommunalbestyrelsi periarfissineqarpoq ataatsimiititaliat ataavartut siulittaasuinut naliliinerit ataasiakkaat tunngavigalugit akissarsianik ilassutissanik aalajangersaasinnaaneranik. Aalajangersagaq eqqarsaatigineqarpoq atorneqartassasoq siulittaasoq suliassanik nalinginnaasutut suliarineqartussanit immikkuullarissuteqartunik suliaqaraangat.

Imm. 3-mut

Sinniisoq kommunalbestyrelsimut ilaasortanngortoq akissarsiaqartinneqassaaq, ilaasortap aalajangersimasup peqannginnera § 15, imm. 1-imik imaluunniit § 15, imm. 2-mik peqquteqartut tunngavilerneqaraluarpalluunniit. Kisiannili akissarsiat sinniisimut, sivikinnerpaamik qaammatini marluinni ilaasortaasumut nuunneqartariaqanngillat. Tassalu peqannginnermut peqquitas § 15, imm. 1-imik tunngaveqartut arlaqarpata, ilaasortap aalajangersimasup § 56, imm. 8, naartunermut, meerartaarnermut meeravissartaarnermullu tunngasoq naapertorlugu akissarsiaqarnera ingerlaannassaaq.

Imm. 4-mut

Aalajangersagaq atuuttuuvoq kommunalbestyrelsimut ilaasortanut, ataatsimiititaliani ataavartuni sivikinnerpaamik qaammatini marlunni siulittaasuuffeqartunut.

Imm. 5-mut

Aalajangersakkami qinigaasut atuuffimmuut tunngatillugu angalanermik ingerlataqartut, qanorluunniit akissarsiaqartinneqaraluarpata, najugaqarnermut angalanermilu aningaasartuutitut taartisiaqartarnermik pisinnaatitaanermik periaaseq nalinginnaasoq ingerlateqqinneqarpoq. Aalajangersagaq pingaaruteqarpoq kommunalbestyrelsimi aamma ataatsimiititaliat ataatsimiinneranni nunaqarfimmiut peqataasarneranni. Tassungali atatillugu erseqqissarneqassaaq Naalakkersuisut naatsorsuutigimmassuk kommunini ataatsimiinnerni telekkut attaveqaatit annertunerusumik atorneqalissasut.

Imm. 6-mut

Aalajangersakkami aalajangerneqarpoq akissarsiat aalajangersimasut, akissarsianut ilassutit, ullormusiat aamma sulinermi akissarsianik annaasaqarnermut matussutissat kiisalu taakkua akilerneqartarnerannut aamma missingersuusiortarnerannut aalajangersakkanik sukumiinerusunik Naalakkersuisut suliaqarsinnaasut.

Imm. 7-mut

Aalajangersakkami aalajangerneqarpoq nr. 1-imiit 5-imut akissarsiat aalajangersarneqartut tiguneqarnissaat pisussaaffiusoq.

Imm. 8-mut

Naartunermi, erninermi meeravissartaarnermilu inatsit tamatumunnga tunngasoq naapertorlugu kommunalbestyrelsit sulinngiffeqarnissamut pisinnaatitaapput akissarsiaminnik annaasaqaratik.

§ 57-imut

Aalajangersagaq § 67-imik atuuttumik ingerlatitseqqinneruvoq allangortitsisoqarnissaanillu eqqarsaateqartoqanngilaq.

Imm. 1-imut

Aalajangersagaq aqutigalugu borgmesterit il.il. aningaasarsiaat pillugit malittarisassanik aalajangersaanissamut Naalakkersuisut pisussaaffilerneqarput.

Borgmesterit akissarsiaasa aalajangersarneqartarneranni borgmesterip kommunalbestyrelsimi ilaasortatut sulinera ilanngullugu eqqarsaatigineqassaaq.

Imm. 2-mut

§ 23, imm. 1 aamma 2 naapertorlugit borgmesterip tunuartinneqarneranut atatillugu akissarsiat annikillisinneqarnissaanut imaluunniit akissarsiaarutitinneqarnissaanut tunngasumik kommunalbestyrelsi aalajangiisinnaavoq. Aalajangiineq pissaaq naammassinnikkusunnginnerup annertussusaa qanorlu ittuussusaa mianeralugit.

Imm. 3-mut

Kommunalbestyrelsip aalajangiinera imm. 2 naapertorlugu kommunalbestyrelsip aalajangiinera borgmesterip piunasaqarneratigut kommunalbestyrelsip eqqartuussivimmuut suliaannangortissavaa.

§ 58-imut

Aalajangersagaq aqqissuussaannikkut allangortitsivigalugu § 67a-mik atuuttumik ingerlatitseqqinneruvoq, allangortitsisoqarnissaanillu eqqarsaateqartoqarani.

Borgmesterit il.il. pensionit pillugit ilitsersuummik nassiussisoqassaaq.

§ 59-imut

Aalajangersagaq § 68-imik atuuttumik ilaatigut ingerlatitseqqinneruvoq. Siunnersuutigineqarpoq kommunini sulisut nalinginnaasumik aningaasarsiaat soraarnerussutisiassaallu pillugit atugassarititaasut pillugit isumaqatigiissutit Naalakkersuisut kommunillu akornanni isumaqatigiissutigineqartalissasut.

Imm. 1-imut

Siunnersuutikkut kommunit Naalakkersuisullu kommunini sulisunut aningaasarsiatigut, atorfeqartitaanikkut soraarnerussutisiaqartitaanikkullu atugassarititaasut pillugit nalinginnaasumik

isumaqatigiissuteqarsinnaalissapput. Taamatuttaarmi aalajangersakkap imarisaanut tunngatillugu allannortitsisoqarnissaanik imaluunniit aalajangersakkap atugaanera pillugu maannamut periaaserineqartunik allannortitsisoqarnissaanik eqqarsaateqartoqanngilaq.

Imm. 2-mut

Aalajangersagaq nutaajuvoq.

Aalajangersakkakut periarfissiisoqarpoq nalunaarutininik saqqummersitsisoqartarnissaa sulisunut Naalakkersuisut kommunillu akornanni isumaqatigiissutinut ilaasunut nalinginnaasumik aningaasarsianut, atorfeqartitaanermut soraarnerussutisiaqartitaanermullu atugassarititaasunut tunngatillugu. Taamatut periarfissiinikkut innuttaasut ataasiakkaat inatsisitigut isumannaatsuunissaat annertusarneqassaaq.

§ 60-imut

Aalajangersagaq § 69-imik atuuttumik ingerlatitseqqinneruvoq, allannortitsisoqarnissaanillu eqqarsaateqartoqanngilaq.

Nakkutilliisoqarfimmi ilaasortat akissarsiaqartinneqassapput Inatsisartuni Naalakkersuisunilu ilaasortat akissarsiaqartinneqartarnerannut il.il. Inatsisartut inatsisaat il.il naapertorlugu.

§ 61-imut

Aalajangersagaq § 70-imik atuuttumik ingerlatitseqqinneruvoq, allannortitsisoqarnissaanillu eqqarsaateqartoqanngilaq.

Imm. 1-imut

Aalajangersakkakut aalajangiunneqarpoq kommunalbestyrelsimi ilaasortat sulianik pineqartunit akisussaaffigineqartunik suliarinnikkusunngitsunut Nakkutilliisoqarfiup pinngitsaalisaasumik pillammik akiliisussanngortissinnaagai. Aalajangersagaq assersuutigalugu atorneqarsinnaavoq kommunalbestyrelsi § 48 naapertorlugu Naalakkersuisunut paasissutissanik aammalu pappilissanik uppernarsaatininik tunniussiumanngippat.

Imm. 2-mut

Aalajangersakkakut aalajangerneqarpoq Nakkutilliisoqarfiup kommunalbestyrelsimut ilaasortaanut kommunip annaasaqarsimaneranut akisussaasunut taarsiissuteqarnissaq siunertaralugu eqqartuussisunut tunniussisinnaanera. Taarsiissuteqarnissamik suliassanngortitsinermut atatillugu annaaneqartut amerlassusissaannik aalajangersimasunik killiliisoqarsinnaanngilaq. Taarsiissuteqarnissamik suliassanngortitsinissami annaasaqaatit qanoq amerlatiginissaat pisuni ataasiakkaani nalilersorneqartassaaq.

Imm. 3-mut

Aalajangersakkakut siunertarineqarpoq taarsiissuteqartarnerni akiliisitsisarfirmik eqqartuussisutigut suliassiinissamut taarsiussinnaasumik pilersitsisoqarnissaa. Taamaakkaluartoq suliassiinissamut piunasaqaatit naammassineqarsimasussaapput, tassa imaappoq kommuni annaasaqarsimassaaq, aammalu ilaasortaq taarsiissuteqarnissaminut akisussaasuussaaq Kalaallit Nunaanni eqqartuussisarnerni aalajangersakkat nalinginnaasut naapertorlugit.

Pineqanngilaq ilaasortat akiligassap annertussusianik akisussaaqatigiillutik akiliisussaaqatigiinnissaat, akiliutissallu amerlassusissaat ilaasortanut ataasiakkaanut aalajangerneqartassallutik.

Ilaasortat arlallit akiliisussanngortinneqarpata taakkulu ilaannaasa akiliinissaq akuersaarumappassuk, taava Nakkutilliisoqarfiup suliassaq taakkununga tunngatillugu uninngatikkallarsinnaavaa ilaasortanut akiliinissamik kissaateqarsimanngitsunut eqqartuussiviup aalajangiinissaata tungaanut.

Imm. 4-mut

Aalajangersakkami malittareqquneqarpoq ilaasortaq pinngitsoorani taaseqataassasoq aalajangiassamut kommunalbestyrelsip aalajangiiffigisariaqagaanut ilaasortap nalunngeriigaanut nalunngereersimasariaqagaanulluunniit, akerlianilli ilaasortaq aalajangiassamut akerliulluni taasissasoq nalunngikkuniuk nalunngittariaqaruniulluunniit tamanna inatsisunik saneqqutsinerusoq.

Ilaasortaq taasinnikkuni akisussaatinneqassaaq aammattaarli peqquteqarani ataatsimiigianngitsoorsimaguni aammalu nalunngikkuniuk imaluunniit ilisimasariaqaraluarlugu ataatsimiinnermi peqataasimagaanni unioqqutitsilluni aalajangiineq imaluunniit pinngitsoortitsineq pinngitsoorsimasinnaagaluartoq.

§ 62-imut

Aalajangersagaq § 71-imik atuuttumik ingerlatitseqqinneruvoq, allanngortitsisoqarnissaanillu eqqarsaateqartoqanngilaq.

Aalajangersagaq periarfissiivoq annaasaqarnikkut taarsiissutissanik ikililerisinnaanermik, tassa pisuussuteqarneq sakkukinnerulersitsinissamik ersersitsippat, ajoqusiinerup annertussusia pissutsillu aallat tunngavigalugit.

§ 63-imut

Aalajangersagaq § 72-imik atuuttumik ingerlatitseqqinneruvoq allanngortitsisoqarnissaanillu eqqarsaateqartoqanngilaq.

Imm. 1-imut

Inatsimmik matumangga unioqqutitsinerit annertuut pinerluuteqarnertut isigineqartussanngornerat kommunit aalajangigaannik atorunnaarsitsisarnermik atorunnaarallartitsisarnermillu, pinngitsaaliilluni akiliisitsisarnernut, inuttullu akisussaaffeqarnermut malittarisassanut siunertaqarluartumik ilassutaasoq, aammalu tassaalluni Naalakkersuisunut ilaasortat akisussaaffeqarnerannik malittarisassanut isumatusaartumik naleqqiunneqartoq.

Imm. 2-mut

Aalajangersagaq ilanngunneqarpoq aqutsineq pillugu inatsit pillugu politiinut nalunaarutiginnittarnerit tunngavissaqanngitsut, suulluanngippallaartut nalorninartullu pinngitsoortikkumallugit.

§ 64-imut

Imm. 1-imut

Siunnersuutigineqarpoq Inatsisartut Inatsisaat 1. januar 2018-imi atuutilersinneqassasoq.

Imm. 2-mut

Peqatigitillugu Kommunit aqunneqarnerat pillugu Inatsisartut inatsisaat nr. 22, 18. november 2010-meersoq kingusinnerusukkut allannguutitalik atuukkunnaarsinneqarpoq.

Imm. 3-mut

Aalajangersakkami aalajangerneqarpoq nalunaarutit inatsit atuuttoq naapertorlugu suliarineqartut atuutiinnassasut inatsimmi aalajangersakkat naapertorlugit allanngortinneqarnissaasa imaluunniit atorunnaarsinneqarnissaasa tungaannut.